

# JISHIMIKILA JABUMI BWAMI



Twayai tukunyike mitwe yetu pa kimye kicheche tulombe.

Taata Wetu Wamwiulu wa lusa, ke kyamashuko abaya o tuji nao akwiya kwi Anweba, Lesa wetu ne Mupulushi. Byo twaumvwa lwimbo wawama bingi, *Yenu Mwine Yenu Mwine*, atweba kituletela lusekelo mambo twayuka mba Anwe yenu mwine. Kabiji twalomba mba bukata Bwenu busoloke kwi atweba kipya kipya, mute uno, kimye kyo tubena kwamba. Kabiji kyafikila pa kimye kyami, mu kimye kitanshi mu myaka yavula, yakubwela kunyuma mu bintu byapita mu bumi, kabiji Nalomba mba Anweba musakupa bulume ne—ne byo Mbena kukeba, Nkambo, pakuuba mba twikale mu uno awala. Kabiji bilubo byami byavula bikale ke jibwe-jakukajijilapo bantu bakwabo, abyo byakonsha kwibaleta pepi ne Anweba. Kiswishai kye, Nkambo. Lekai bandengamambo bamone tampulo yangayo mubusenga bwa kimye, kabiji bakonshe kuletwa kwi Anweba. Abye bintu twaimpuzha mu Jizhina ja Nkambo Yesu. Ameni.

Anweba ikalaiko.

<sup>2</sup> [Mulongo Glover waamba mba, “Mwakonsha kulombelela tutwe tutambala kasa mukyangye kutatula?”—Waku.] Njibingi na lusekelo. [“Kuji *byobya* ne *bibye* bya kulombelela.”] Kijitu bulongo, mwane, nemusachila. Byonka yuwe mwanamulume wazhijikwa, Mulongo Glover, ao ye Nayuka pa myaka yavula, najinga na jishuko jakwikala nanji kimye kicheche mabaanga abufuku. Kabiji aye wambula pa . . . aye waiketu pa kimye kimo, na kukokoloka. Kabiji pano, pa myaka ya kusemwa sebeta-faivi, ubena kubwela jibiji mu mwingilo wa Nkambo. Amiwa kechi nafika pa afu wakukoka nobe byo Najinga kasa Kyangye kumvwa kyokyo ne. Nalangulukilenga mba Nakoka, bino Ami—Ami kechi naketekela mba Byonji ne. Aye wajikubika papo kwi amiwa tutambala tumo, mu—mu musango wa mavelopu, kabiji ne bikwabotu, amo motuji mukachi kabiji twalongwa kala.

<sup>3</sup> Pano, anweba bamo muji mu mampuzha mobena kuteleka kuwaileshi, nangwatu muno, aabo babena kukeba kamo ka tutwe tutambala, kabiji mwakonsha ku . . . Ba Angelus Temple batwajijilatu na kutuma, bimye byonse. Anweba mwakonsha kunembela kuno ku Angelus Temple kabiji baketulombelela, mambo Nsakwimupa luketekelo amba akye ke Kinembelo. Ke mulaye wakwa Lesa.

<sup>4</sup> Kabiji inge kyaikala mba anweba mubena kukeba amiwa mba ne mulombelele, kika, Amiwa kekala walusekelo kuuba kyokyo. Mwafwainwatu kunembela pa keyala wa 3-2-5, 325, Jeffersonville, kusopelela ke J-e-f-f-e-r-s-o-n-v-

i, ba l babiji, e. Jeffersonville, Indiana. Nangwa inge kechi mwakonsha kulanguluka pa keyala ne, anweba nembelaitu ku “Jeffersonville.” Ke muzhi mucheche, muji kubalwa kwa bantu pepi nobe sate-faivi sauzande. Muntu yense wanyuka ami kokwa. Kabiji twakonsha kwikala balusekelo kulombelela katambala kabiji ne kwikatuma.

<sup>5</sup> Kabiji, pano, twaingila bingi bulongo kunyuma mu kuba kikye, mambo. . . Anweba mukatambula kipepala kicheche kya kalata kyakunembapo, mambo bantu ntanda yonse balomba lukeke pa naini koloko, kabiji ne pa twelufu koloko kabiji ne pa fiili koloko. Kabiji mwakonsha kulanguluka, kuzhokoloka ntanda yonse, ng’anyi kimye kyabufuku kyo bafwainwa kubuuka na kulomba iye milombelo. Nanchi inge bonse bo mateni a masauzande, kabiji mateni a masauzande, babena kutuma milombelo kwi Lesa pa kimye kimotu kulombelela uno mwingilo, misongo yenu, Lesa kuuba wakanatu byonkabyo ne. Kabiji nanchi pano atweba, nobe byo Mbena kwamba, kechi tujipo na mitachi ne, atweba kechi tubebapo nangwa penyi umo wa mali enu ne. Atweba tujitu. . . Inge anweba twakonsha kwi mukwasha, akyo kyo twaikelako. Kabiji twayai. . .

Muntu umo ubena kuleta mulumba mukwabo wa tutambala.

<sup>6</sup> Pano, inge kechi muji na katambala komwakeba kutuma ne, kyawama, nanchi mwanembatu, nangwa byonkabyo. Inge kechi mubena kwikikeba ne ponka pano ne, kisungai mu Buuku wa Byubilo, mu Baibolo, kyapitala kya bu 19. Kabiji kekala mu musango kajiponda katoka kakacheche ako kakatumwa kwi anweba, kabiji ne mikambizho byo mwafwainwa kwisolola bubi bwenu patanshi. Kabiji (ne musachila) byo mwakonsha kwisolola bubi bwenu. Anweba kechi mwafwainwa kweseka kutambula kintu kiji kyonse kufuma kwi Lesa kwakubula patanshi kolola bintu na Lesa. Mwamona? Kabiji mwakambizhiwa mukikye kwita bomwalamakana nabo, kabiji ne bakafunga benu. Inge muji na kintu kimo mu muchima wenu na muntu umo, yai mukawamishe bintu patanshi, bino apa mwabwela kuno. Bino apa mwalomba, mwaikala na milombelo munzubu yenu, kabiji mwasonena katambala ku kyakuvwala kya kuushi, apa bino mwaketekela ne Lesa. Kabiji pa oa maawala asatu, pajuba pajuba, kukekala bantu mwaya ntanda kasa babena kulomba, kasa bakwatakana kuzhokoloka ntanda yonse.

<sup>7</sup> Kabiji pano ke kyobe, kyatutu, obe tumatu. Kabiji—kabiji, pano, atweba kechi tukanembanga kubwezha kwi anweba ne nangwa kwi mubuula tachikilo iji yonse yo twatachika ne. Atweba twakeba mba anweba mutundaikwe alwe lunengezho, bino atweba kechi—kechi tujipo umo wakatundaika ne. Mwamona? Nanchi anweba. . . Kechi kutambula keyala wenu ne, ke pakulalatu ne mwingilo wa Nkambo, ye tubena kukeba kutwajijila.

<sup>8</sup> Pano twayai tukunyike mitwe yetu. Kabiji inge muji muntanda ya kuteleka ku wailishi, bikai kitambula kyenu byobya, ne kubikapo kuboko kwenu mu kimye kyo tubena kulomba.

<sup>9</sup> Nkambo Walusa, twaleta kwi Anweba atwe tubipe tuheche, kape tumo tubena kumweka nobe tumavesiti twamwana lukeke, nangwa—nangwa kamo kajilaya kakacheche ka mukachi, nangwa kape nobe tumambuti tuheche, nangwa—nangwa kintu kimo, katambala, bibena kuya ku bakolwa ne bamanyikwa. Nkambo, kiji monka mwaila Kyambo Kyenu kyo tubila bibye. Mambo tutanga, mu Buuku wa Byubilo, amba basendele kufuma kumubiji wakalume Wenu, Paulo, tutambala ne maepulo, mambo baketekejile mba Mupashi Wenu wajinga pa yewa muntu. Kabiji mipashi yatama yafumine mu bantu, kabiji byakumanama ne bikola byafuminemo, mambo baketekejile. Kabiji pano twalanguluka, Nkambo, amba atweba kechi twi Paulo Wazhila ne, bino twayuka mba Anweba mukijitu Yesu. Kabiji twalomba mba Anweba musakupana ku lwitabilo lwa baabo bantu.

<sup>10</sup> Kabiji kyaambiwe kimye kimo amba Isalela, byo aesekelenga kukokela Lesa, wakwachilwe mulweseko, kulutwe yabo kwajinga kalunga kamema, mitumba kumbaji yonse ibiji, kabiji mazhita akwa Felo kasa eya kunyuma. Kabiji umo waambile, mba “Les a watajile panshi kupita mu Mumbulungwa Wamujilo, na meso azhingila, kabiji kalunga kameema kaumvwine moyo ne kwifunga ako kene, kabiji walengejile Isalela jishinda ja kwabukilapo kuya ku ntanda ya mulaye.”

<sup>11</sup> Anweba Nkambo, mukatale panshi ne jikwabo, mukimye abye bipe po bakebibika pa mibiji ya bakolwa mu kuvuluka Kyambo Kyenu kyumi. Kabiji lekai misongo ikale yachina, talai kupita mu Mashu a Mwaana Wenu, Yesu, Ao wafwijile aye mfutoyamambo. Kabiji lekai mulwanyani omvwe moyo ne kufumapo, pakuuba mba abo bantu batwele mu mulaye, amba “Pabyonse bye,” ke nkebelo Yenu yakuuba mba “twikale na bumi bwawama.” Kiswishai kye, Taata, mambo twibituma na—na yoya nkebelo mu michima yetu. Kabiji apo popotwaimena. Twibituma mu Jizhina ja Yesu Kilishitu. Amena.

Nakusachila, Mulongo Glover. Nakusachila, mwane.

<sup>12</sup> Bino, bufuku buno byo buji bwakupezhako bwalulwe lubaji lwa kusangululwa, Amiwa kechi nayuka ne kana isakwikala pa wailishi nangwa ine, bino Nakonsha kwamba mba (inge ne) kujibumba jiteleka ku wailishi, amba akwe ke kupwila kumo kwakila bingi mukuwama ako ko Naikala nanko pa myaka, myaka yavula bingi. Yaikala yakosa, yalumbuluka, yo batemwa bingi, mpwijilo ya kukwatakana ayo yo Natanwamo pa kimye kyabaya bingi.

<sup>13</sup> [Mulongo umo waamba mba, “Tuji pa mwela kufikatu ne pa kota pasiti foolo, mulongo. Kabiji babena kunkuteleka, California yense wakabeta kabulenge, kufikatu ne pamakuji, kabiji ne mumato. Tubena kutambula masawakya kufuma kwi abo. Kabiji nanchi uji na jibumba jabaya bingi, masauzande a makumi a masauzande.”—Waku.] Nemusachila, mwane. Akyo kyawama bingi. Kelusekelo pa kumvwa kyokyo. Lesa emupeshe anweba bonse.

<sup>14</sup> Bino Amiwa kine kimye kyonse ngikala na buwame mu muchima wami na mambo a Angelus Temple, mambo aye waimena pa Mambo awama onse akwa Yesu Kilishitu. Kabiji, pano, ki—kimwekatu pano nobe wami. Kimwekatu nobe, panyuma ya kukumanya bonse ne pakumona mipashi yabo yawama, Namwekatu nobe Amiwa ne umo wa mwi anweba kukila byo Naikalanga kala. Lesa emupeshe, yo milombelo yami. Kabiji. . . [Jibumba ja ponena mutuseko—Waku.] Nemusachila, na lusa.

<sup>15</sup> Pano, kyatongwelwe amba jaleelo Amiwa nsakwamba kwi anweba kimye kicheche pa: *Jishimikila Jabumi Buami*. Akyo ke—ke kintu kyakosela bingi. Akino kisakwikala ke kimye kitanshi kyo Naeseka kwamba pa kikye pa myaka yavula. Kabiji kechi Njipo na kimye kyakuya mu kuzhika ne, bino ke lubuji lumotu. Kabiji, mubino, Nauba bilubo byavula bingi, nauba bintu byavula byatama. Kabiji Nakonsha kukeba, mba anweba muji mu mampuzha mo babena kuteleka ku waileshi ne anweba muji pano, namba anweba kechi musende bilubo byami bikale ke mabwe-akwitutulako ne, kana ke mabwe-akukajijilapo kubwela kwipi kwi Nkambo Yesu.

<sup>16</sup> Pano, bufuku buno, bitupa bya kulombelelapo byafwainwa kupewa pa mpwijilo yalubuko bufuku buno. Pano, inge twaamba pa *mpwijilo yalubuko*, kechi kyalumbulula mba atweba twakonsha kubuka muntu ne, atweba tusa “kulombelela muntu umo.” Lesa ye ubuka. Aye uji bingi na lusa ne amiwa, mu kukumbula milombelo.

<sup>17</sup> Kabiji Naambilenga na mukulumpe utangijila umo musapwishi waya bingi nkuwa, kuno konka kimye kya kunyuma, kabiji—kabiji kyaipuzhiwe mba kika awe musapwishi kyo abujila kulombelela bakolwa. Kabiji musapwishi wa mukumbwile awa—awa mukulumpe utangijila mpwijilo yami, amba, “Inge. . .” Awe musapwishi waketekela mu lubuko lwa Bulesa. Bino umvwe wakonsha kutatula kulombelela bakolwa, kyakonsha kuchibakanya mwingilo wanji mambo aye bamutundaika ku bipwilo. Byavula bipwilo, ne bavula ba mwiabo, kechi baketekela mu lubuko lwa Bulesa ne.

<sup>18</sup> Nanchi Amiwa nji na munema ne mushingi nayewa musapwishi mambo aye ubena kulama kifulo kyanji, kifulo kyanji kya mwingilo. Aye wakonsha kape. . . Amiwa kechi

nakonsha kusenda kifulo kyanji ne, kabiji Nazhinauka kana aye wakonsha kusenda kifulo kyami. Atweba bonse tuji na kifulo mu Bumfumu bwa Lesa. Atweba twanungakana pamo. Byapusanapusana byabupe, bino ye Mupashi umo. Mwenkelo yapusanapusana, Natazha mukuuba mba, bino ye Mupashi umotu.

<sup>19</sup> Kabiji, pano, bufuku buno mpwijilo isakutatula... Naketekela baambile mba kwimba kwabanyimbi kukatatula pa sikisi-sate. Kabiji, pano, inge muji mu mantanda mobateleka ku waileshi, iyai muteleke ku bibye. Ki... Kikekala kyawama bingi, kimye kyonse.

<sup>20</sup> Kabiji pano Nakeba kwamba mba bitupa bya milombelo bisa kupewa bukiji bukiji pa kupwishatu ino mpwijilo, bukiji bukijitu aku mpwijilo ipwatu, inge muji muno kabiji mubena kukeba kitupa kya milombelo. Amiwa na ku kambizhiwa monkamwa mu kimye kicheche kyapita, mwaanami nangwa Mr. Mercier nangwa Mr. Goad, basakupana bitupa bya milombelo. Anweba ikalaitu mu bipona byenu. Inge mpwijilo yapwa, shalaitu mwaikala pa kipona kyenu nanchi basongwalume bakonsha kupita mu mulaini ne kupana bitupa bya milombelo bukiji bukiji. Akyo kyakonsha kwikala mu bibamba byapeulu nangwa panshi, kuji konse, bibamba byapanshi nangwa kuji konse kouji, anweba ikalaitu mu kipona kyenu kabiji basongwalume basakuyuka mba anweba muji muno na kupembelela bitupa bya milombelo. Kabiji bufuku buno tusa kulombelelanga bakolwa. Kabiji inge Nkambo wabula kupipula milanguluko yami, Nasaka kusapwila pa mutwe bufuku buno, *Inge Anweba Musa Kwitumweshu Bashenu, Kisa Kwituwaina.*

<sup>21</sup> Pano Nasaka kutanga kibaba kya mute uno, nobe pakutatwilatu *Jishimikila Jabumi*, kitanwa mu Buuku wa Bahebelu, kyapitala kyabu 13, kabiji twayai tutatwile papo nobe... Naamba namba nobe pa veleeshi wa 12.

*Byonkabyo ne Yesu naye, byo asakile kwibazhijika bantu na mashi anji mwine, wamanamijile pangye ya nkambi.*

*Twayai tuye...onkao mambo ko aji pangye ya nkambi, kasa tusenda mwenga wanji.*

*Mambo pano panshi kechi tuji na muzhi wamyaka ne, byonkabyo tukeba yewa ukeya.*

<sup>22</sup> Pano awe ye musango wa kibaba. Mambo, mwamona, inge kiji ke jishimikila jabumi, nangwa kintu kyonse kyatala pa bumuntu, atweba kechi tutumbijika kyokyo ne, kabiji kukijishamo bya—bya mubwikalo bwa muntu bwapita kala, inge bwajinga bwafita nobe byonka byajinga bwami. Bino Nalangulukile mba, inge twatanga Kinembelo, Lesa wakonsha kupesha Kinembelo. Kabiji milanguluko yami ke ino:

*Amba pano panshi kechi tuji na muzhi wamyaka ne,  
byonkabyo tukeba yewa ukeya.*

<sup>23</sup> Pano, Nayuka mba anweba mwatemwa bingi Los Angeles. Anweba muji na nsambu ya kwikyuba. Ke mukatampe, muzhi wawama. Nakafwa ujimo ne bika-bikwabo, nangwa byonkabyo ke muzhi wawama, lubesha wawama. Bino uno muzhi kechi wakonsha kutwajijila ne, wafwainwa kwikala na mpelo.

<sup>24</sup> Amiwa naimanapo mu Lomu (amo bamamfumu bakatampe) kabiji ne mizhi ayo yo balangulukilenga mba bakashimika ibula kufwa, kabiji mwakonsha kupoya panshi mafiti tweti pakuuba mba mutane byakundauka biji mumushinji.

<sup>25</sup> Amiwa naimana popa ba Felo pobajinga na bufumu bukatampe, kabiji mwakonsha kupoya panshi pakuuba mba mutane popa ba Felo bakatampe po batangijilenga.

<sup>26</sup> Atweba bonse twatemwa kulanguluka pa muzhi wetu kabiji ne bifulo byetu. Bino, vulukai, kechi bikemana ne.

<sup>27</sup> Kimye kyo Najinga songwalume mucheche natemenwe kuya ku kinchi kikatampe kya mapo. Mukyaalo kyami tuji bingi na binchi byavula byakonsa. Kabiji twajinga na kikye kinchi kya mapo, mapo washunga, kabiji ne yetutela mba “mapo wakosa” kabiji ne “mapo wanekena.” Awe kinchi mukatampe wabaya bingi, kyajinga kinchi kyawama bingi. Kabiji inge Nafuma mu majimi, na kwingila mu kajo kabanyama ne—ne kunowa, Natemwanga kuya kuyuwe kinchi mukatampe ne—ne kwikala mushi akyo kabiji—kabiji ne kutala kwiulu. Kabiji Namonanga ikatampe, misapi ya bulume kasa ibena kusukana na mwela, kishiki kyabaya bingi. Kabiji Naambile mba, “Mwayuka, Naketekela mba awe kinchi ukekalapo ma aduleedi ne ma aduleedi amyaka.” Kechi papitapo myaka yavula ne Natajile pa yewa kinchi wakala, kyaimana kasa kyauma.

<sup>28</sup> “Mambo pano panshi kechi tujipo na muzhi wayaya ne.” Ine, kafwako nangwa kimo panopantanda kyo mwakonsha kutalapo akyo kikatwajijila ne. Kyafwainwa kwikala na mpelo. Kyonse kintu kifwa kyafwainwa kupana lubaji lwa kyokya kibula kufwa. Nanchi nangwa tushimike mikwakwa yetu yawama bingi, nangwa tuwamishе bishimikwa byetu byepi, byafwainwa kuya byonse, mambo pano panshi kechi pajipo kintu kyakonsha kutwajijila ne. Kanatu yeka Ubula kumweka ye utwajijila.

<sup>29</sup> Navuluka nzubo yetu mo twaikalanga, yajinga nzubo yakala yabinchi yo bamasako mulobwe. Amiwa...Kapepo bavula kechi bakimonapo nzubo yo bamasana na mulobwe. Bino yonsetu yajingatu yobamasana na mulobwe, kabiji ne bisomo byabaya bikatampe abyo byajinga ku nzubo yakala, Nalangulukilenga mba aya nzubo ikakonsha kwimana myaka ma aduleedi. Bino, mwayukatu, buleelo paimene aya nzubo pabena kushimikwa manzubo avula bingi. Kekintu kyapusanako bingi. Bintu byonse bibena kupipulwa. Bino...

<sup>30</sup> Kabiji Namonanga bataata, abo bajinga baipipa, muntu wajitakana, wakosa bingi, kabiji bajinga umo wabooba bantu bacheche bakosa bingi bo Nayukile. Nasambakene Mr. Coots, mukwabo mo baingijilanga mubinchi, aye wajinga walepa, kabiji pepi nobe mwaka umo wapita, kabiji Mr. Coots ke mulunda nami wawama bingi, kabiji ke kwasho wa kipwilo Kitanshi kya Baptist, kabiji aye waambile mba, “Billy, wafwainwa kwikala muntu wabulume bingi.”

Kabiji Naambile mba, “Ine, kechi byonji ne, Mr. Coots.”

<sup>31</sup> Aye waambile mba, “Inge wapashishe bashobe, kana byo uji.” Waambile mba, “Namumwene awa muntu, kunema mashikelo aduleedi ne fote mapaudi, walonga mwandalo mu kikochikala bunke bwaji, ao wanema naini aduleedi mapaudi.” Aye wayukile bingi mwakwikyubila. Wajinga wakosa. Nebamonanga kwiya mu kifulo kya kowelamo ne kwingenzeza kuja kajo kamulajilo, kimye Bamaama po beebetanga.

<sup>32</sup> Kabiji twajinga na kinchi kyakala kya mapo kyajinga kulutwe yalubaza, kabiji kwajinga bisatu nangwa foolo bya bicheche kuya na kunyuma. Kabiji monka mu kinchi kya pakachi mwajinga galashi yakala yakutajilamo, yalajika, galashi, ikatampe. Kabiji yatwezhiwe kulubaji lwa kinchi na misumali yobakokomeka. Kijitupo nobe bamo basendwe bamapulanga babena kuteleka kyobatela mba “kyakukobekako byakuvwala.” Bekikokomeka pakuuba mba kikwate galashi. Kabiji kwajinga kikopo kyakala kyakusakulako. Baanga bamonapo kikopo kyakala...musango-wakala wa kikopo kyakusakulako? Nakonsha kwikimona.

<sup>33</sup> Kabiji kwajinga ne jipulanga jicheche jakala ja kowelapo, ke jipulangatu jimo jicheche jiji na mukupa umo mushi yajo, jo bapopela ku kinchi. Icheche, yakala, jilayo yo twatapulungako meema, kabiji twaowelanga pa kyonka kinchi kyakala. Kabiji Bamaama balenganga mataulo kufuma ku masaka abunga. Ng’anyi wakingijishapo kala taulo wajisaka ja bunga? Kyawama, Amiwa kine Naumvwatu nobe njiipetu. Kabiji aa akatampe, mataulo akala akosakana! Kabiji umvwe ke betomvwe atweba banyike, abo bakonshanga...kyumvwanyikatu nobe babena kusuba kikoba kimye kyonse kyo bapisha pa mubiji. Kabiji Navuluka joja jisaka jakala ja bunga. Kabiji bakonkangamo tonge umo, ne kulengamo masekebele, pakuuba mba kimwekako bulongo.

<sup>34</sup> Baanga balalapo pa matuleshi wabutonge? Kyawama, Amiwa nakonsha—nakonsha kwaamba mba! Baanga bayukapo pilo ye balongako bipu? Kyawama, Mulongo Glover, Amiwa nji pamuzhi pano, kine pakatampetu! Matuleshi wabutonge, kyawama, kechi papita kimye kyabaya kufuma po Nalekejile kwingijishapo umo, kabiji kyajinga...Oo, ke—ke ndajilo

yawama, yatalala. Nanchi mu kimye kya mashika batolanga mwanya wamayona ne kulalapo, mwayukatu, kabiji pano ke kubika kibese kyatente peulu yetu mambo mabebe amashika apita mu—mu—mu aya milala ya nzubo, mwayukatu, byakala byo bamvwetanga pa mutenge, mwayukatu, kabiji mabebe amashika pakuuba mba apitepo lubilo. Kabiji, oo, Nakonsha kuvuluka bingi bulongo.

<sup>35</sup> Kabiji nanchi Banyimbi bajinga na kyakutendako suki. Na... Pano akye kisakwimukwata ne anweba. Kyalengelwe na bipongwe byamataba, kwikala na kyakwisakulako kya kipongwe. Aye watolanga sopo wakala bamaama ye balenganga, kumutola ne kwibikaye mu kilungi nakyakwisang'unako, kabiji ne kutenda na kabaya, kakala kaleza katanama. Kabiji Pamulungu batolanga abya—abya bibese bibese bya bipepala, ne kulamika kunyuma ya nteneshi, bamvwalanga manteneshi amapulasitiki kabiji ne kubika ku nteneshi bibye mu kukanya akya—akya—akya kiseba kubula kukwata ku nteneshi yajilaya. Mwikimonapo kala kyaubiwa nyi? Kika, ami, ami!

<sup>36</sup> Navuluka nsulo icheche yakala kokwa kunshi, ako kotwafumyanga meema akutoma, kabiji ne kufumya meema mu kibaya kyakala. Baanga bamonapo kibaya? Kyawama, baanga ba mwianweba bafuma ku Kentucky, nangwa byonkabyo? Ee, kyawama, talaitu kuno mumone bena Kentucky. Kyawama, ami, Amiwa—Amiwa jitu ponka... Najikulangulukanga mba bena Okies ne bena Arkies bonka bonkatu uno, bino talai kiji nobe Kentucky ubena kutwelamo. Kyawama, abo bataine manyi mu Kentucky bang'ondo bacheche bapita kunyuma, mwayukatu, nanchi kape bobamo bena kwiya kuno.

<sup>37</sup> Kabiji nanchi Navuluka kimye Bataata po baiyanga na kowa amba baje kajo kabufuku, bavunganga maboko ajilaya, kabiji ne yoya mikoko yakosakana ipi ipi. Kabiji umvwe baolola mikoko yabo amba bowe, kutaya meema mu kilungi kyabo, aya misunyi yivungilatu pamo mikoko yabo icheche. Kabiji Naambile mba, "Mwayuka, bataata bakekala kufika pa myaka aduleedi nafifiite." Bajinga bakosa bingi! Bino abo bafwiletu pa fiifite-tuu. Mwamona? "Apano panshi kechi pajipo muzhi watwajijila ne." Abyo ibyo. Kechi twakonsha kutwajijila ne.

<sup>38</sup> Pano twayai tutole lwendo lucheche, atweba bonse. Muji anweba bonse pa muntu pa muntu muno uji najishimikila ja bumi, nobe byonka Byonji, kabiji ke kintu kyawama kyakwenda lwendo lwa kulabijila byapita mu kimye kimo. Kechi mwalanguluka byobyo nenyi? Kubwelatu kunyuma, kabiji atweba bonse twayai tubwele kunyuma pacheche, tubwele kubintu bimo byotwapitamano nobe baana babacheche.

<sup>39</sup> Kabiji pano lubaji lutanshi lwa jishimikila ja bumi. Amiwa nsakwambatu bicheche, mambo biji mu buuku kabiji ne anweba bavula mujinanji buuku.



40 Amiwa nasemekejiawe mu kanzubo kacheche ka kumitumba, monka mu mitumba ya Kentucky. Bajinga na lumu umo mo twaikalanga, kechi mwajinga nangwa machi panshi ne, nangwatu mapulanga panshi ne, mwajingatu mushiji panshi. Kabiji kishiki, peulu ya kishiki pachibilwa na mikupa isatu, ye wajinga tebulu. Kabiji bonse ba Branham babacheche beyuzhangatu monka, kabiji kulupuka kuya ne palutwe ya kanzubo kakala, ne kuvubala kuya pangye, kyamwekelenga nobe jibumba ja maopusamu baalang'enenga mu maloba, mwayuka, bonse balongo babacheche. Atweba twajinga naini, kabiji ne songwakazhi umo mucheche, kabiji wajinga nalukatazho mukachi ka jibumba ja basongwalume. Twafwainwa kupana musingi kwi aye nangwa byonkabyo leelo mwaila bintu byo twauble mu ooa moba. Aye kechi waendanga ne atweba kuji konse ne, twamwipangamo, wajinga mwanamukazhi. Nanchi aye kechi wikiswanga ne, mwayukatu. Nanchi twajinga. . . Kabiji bonse. . .

41 Vulukai kuuba mba kunyuma ya tebulu kwajingatu mipando ibiji, kabiji yalengelwe na byula bya misapi ya kinchi. Ke binchi byakosa byabicheche kwibimvwanga pamo, kabiji ne panshi pabyo bya pikulwa na ngozhi ya kinchi. Bushe kujipo umo wamonapo kipona kyapikulwa nakyula kya ikoli nyi? Ee. Kabiji kechi Nakyumvwa kwi Bamaama ne. Oo, palutwe byo twafikile pantu pa kuuba mba mwikale fulo wamapulanga, na boba baana babacheche pa majoma *bibye*, kabiji kukasa kyokya kipona kyakala ke kubatu mbamba, mbamba, mbaa pafulo. Kabiji Navuluka kukanya babacheche kuba mba bakalupuka pangye ya kibelo, mu kimye kyakuchapa nangwa kintu kimo, bakonsheshe kubika kipona panshi kabiji ne kwikikingibika ku kilang'anya ku kibelo, mu kukanya babacheche kulupuka pangye mu kimye kya kuya ku nsulu na kukeba meema, kabiji ne bikwabotu.

42 Kabiji Bamaama bajinga na myaka fifitiini kimye kyo Nasemekelwe, Bataata bajinga eitiini. Kabiji Najinga mutanshi wa mubaana naini. Kabiji bambujile mba alwa lukeelo byo Nasemekelwe. . .

43 Pano, twibayaji bingi, ke bayanji beene bakilamo. Kabiji kechi twajinga ne na wido mukoka kanzubo kakacheche ne. Yajinga nobe na kizhilo kicheche kya mapulanga kyo mwakonsha kushikula. Nazhinauka kana mwamonapo kintu kyayewa musango. Kizhilo kicheche kya mapulanga kyashikukanga nobe wido, mwikishikula mu kimye kya mute ne kwikishika mu kimye kya bufuku. Atweba kechi twaambulangapo malaiti nangwa kumunyika palafini muoa moba ne, twajinga na byomutela mba "lampi wagilishi." Pano, kechi Nayuka ne kana mwamuyuka awe lampi wagilishi byo ajinga. Kyawama, muba byepi. . . Kabiji kana mwapotelepo. . . kutemesha katolitoli ka kinchi? Mambo inge

mwatola katolitoli ka kinchi ne kwikambula kabiji mwabika ne patapa, kyakonsha kuteema. Kabiji ako... kalenga bwishi pacheche, bino kechi bajinga na bipona ne, nangwa byonkabyo, mwakifutumuna pacheche. Pakuuba mba... mukanzubo kechi mubena kufutumuka bwishi ne. Kyakokelenga bulongo mambo mu mutenge mwajinga mpuzha yabaya bingi mwakupichila. Nanchi kiji... .

<sup>44</sup> Kabiji Nasemekelwe mu Mulombola pa—pa jabu 6, 1909. Mambo, mwayukatu, akyo kyandengela kukilapo pacheche tweti-faivi pa kino kimye. Kabiji nanchi, alwa lukeelo lo Nasemekelwe, Bamaama baambile mba bashikwile wido. Pano, kechi twajinga na madokotala ne, kwajinga upapisha. Bino... . Kabiji ne yewa upapisha ke bankambo babakazhi. Kabiji byo Nasemekelwe kabiji ne kutatula kujila kwami kutanshi, kabiji—kabiji Bamaama bakebelenga kumona mwanabo. Kabiji—kabiji ne abo bene bajingatu pamo nobe mwanyike. Kabiji byo bashikwile kawido kakacheche, ponka pakutatulatu kuya nakukya, pepi nobe faivi koloko. Kabiji aye... Kwajinga kasusute kakala kaikele kulubaji lwa kiswa kicheche. Nobo anweba bonse byo mwamona kipikichala kya kiky mu—mu buuku wa jishimikila jabumi bwami. Aka kasusute kakala kaikele popa katatwile kwimba na bulume bonse bwajinga mwiako.

<sup>45</sup> Amiwa kimye kyonse natemwa bingi tususute. Pano, anweba basongwalume babena kuteleka ku waileshi, kechi mwakonsha kwipaya tung'onyi twami ne. Mwamona, banji—banji—banji... . Aba bang'onyi bami. Mwaumvwapo jishimikila ja kasusute, byo katambwile kyaji kyako kyachila? Amiwa nsakuleka pa kakimye kacheche. Byo katambwile kyaji kyanji kichila... Kwajinga Mfumu wa bamfumu wafwilenga juba jimo pa Musalabo, kabiji Aye wamanyikilwenga kechi kwajingapo nangwa umo wakwiya Koanji ne. Aye kechi wajingapo na umo Wakumukwasha ne. Kabiji kwajinga kang'onyi kacheche kachiluluka kakebelenga kufumya misumali pa Musalabo, kabiji ako katwajijiletu kutumbuka pa Musalabo ne kusumauna yoya misumali. Ako kakepele bingi pakuuba mba keifumyepo, kabiji kyaji kyanji kicheche kyaikaletu kyachila na mashi. Kabiji kufumatu ponkapo kyaji kyanji kyaikalatu ke kichila. Kechi mwakonsha kumuloza ne, basongwalume. Mulekaitu buke bwaji.

<sup>46</sup> Ako kaikele ku lubaji lwa wido, na-kuuba kyongo kimye kyaimbilenga kasusute. Kabiji—kabiji Bataata bashijikile wido panyuma. Kabiji byo bashijikile kawido kakacheche kunyuma, akya Kyeya kyo mumona pa kipikichala kyaishile na kuzhokoloka pawido, byo baambile bamaama, kabiji kyakobamine ne pa mwanya. Bankambo babakazhi kechi bayukilo ne kyakwamba ne.

47 Pano, atweba twi. . . kechi twajinga kisemi kya bupopweshi ne. Bantu bami ke ba Katolika. Amiwa ne mu Arish kumbaji yonse ibiji. Ba taata ke beene ba Irish, Branham. Ba maama ke ba Harvey; kanatu, bashabo bo basongwele mu Cherokee Indian, nanchi akyo kyo kyachibakenyeko pacheche ndoonda ya mashi aki Irish. Kabiji Bataata ne Bamaama kechi bayanga ku kipwilo ne, kabiji besongwejile pangye ya kipwilo kechi bajingapo na bupopweshi buji bonse ne. Kabiji akwa kunyuma kwa yoya mitumba kechi kwajingapo ne kipwilo kya Katolika ne. Nanchi bobajinga batanshi kwiya nakwikala, ba Branham babiji baishile, kabiji kufuma popo mwafuma kisemi kyonse kya bena Branham; ke ndondolwelo ya kisemi.

48 Kabiji abo bashikwile. . . Byo bashikwile yuwe wido kabiji ne kikye Kyeya kyakobamine popa, abo kechi bayukile kya kuuba ne. Bataata bapotele (byo baambile Bamaama) ovoloshi wakatataka pa kikye kyaubiwe. Abo baimene na. . . maboko kasa anji mu lubunda wa ovoloshi wakala, nobe boba bendaukatu mungye na kutema binchi byo kwajinga mu oa moba. Kabiji kibaletajile bingi moyo.

49 Kyawama, panyuma yakwikala moba kape nobe teni, nangwa kintu kimo, batwajile ami ku kipwilo kya Baptist kitelwa mba “Opossum Kingdom,” kipwilo kya Opossum Kingdom Baptist. Ajo ke jizhina. Kwajinga musapwishi wendauka wakala, musapwishi waku Baptist wamusango-wakala waiyanga nakupitamo jimo pa bang’ondo babiji. Kutwajijila. . . Bantu baikalanga na mpwijilo icheche pamo, bayanga na kwimba nyimbo imo, bino baikalanga na busapwishi bimye byonse nayuwe musapwishi wendauka. Bamufwetanga pa mwaka jimo jisaka ja myungu ne bintu bikwabo bicheche byonkabya, mwayukatu, mba bantu baimananga nakupana byobyoby bintu. Kabiji awa musapwishi wakala waiyanga, kabiji kokakwa wandombejile ami nobe songwalume mucheche. Alwa lwajinga lwendo lwami lutanshi kuya ku kipwilo.

50 Pakufika pa myaka iji nobe. . . pepi nobe kukila pa myaka ibiji, kimonwa kitanshi kyamwekele.

51 Kyawama, babulang’ene monse mwa mumitumba amba akya Kyeya kyaishile. Nanchi basakilenga kuyuka kana kyo kika. Bamo baambile mba kyafwajijilwe kwikala kyeya kya juba kyabekwilenga mugalashi mu nzubo. Bino kechi mwajingapo galashi ne. Kabiji juba kechi jasamine ne, nanchi kwajinga bingi lukeelo, pa faivi koloko. Kabiji nanchi, oo, be Kipishishetu. Kabiji byo Najinga pepi nobe. . . kape nobe myaka isatu. . .

52 Pano, Nafwainwa kwikala wakishika. Muji bintu mumwe byo Mbula kukeba kwi byamba, kabiji Amiwa Nakonsha kwikikiluka ne kwikyamba ne. Bino nangwa byonkabyo, kubulang’ana bukine, wafwainwa kubulang’ana bukine inge kiji

pe obewa nangwa pa bantu bobo. Ikalai babukishika, kabiji kimye kyonse kijitu pamo.

<sup>53</sup> Ba taata bajingatu kwalepa na kwikala muntu wa bupopweshi. Abo bajinga musango wasongwalume wa mumitumba ao watomanga kikupu, kimyetu kyonse. Kabiji batainwe mulukatazho pa kulwa, kwajinga babiji nangwa basatu banabalume bafwaijilwe kwipaiwa mu kimye kyo balwilenga, kulozang'ana, ne kwichiba abo bene na mipenyi, byo bajinga ku kijiilo monkamwa mu mitumba. Kabiji Bataata bobamo bajinga kulutwe mukukwe kulwa, mambo akuuba mba bajinga na mulunda nabo wikohezhe, kabiji wapumine muntu umo na kipona. Kabiji wajinga . . . Awa mwanamulume wajinga na mupenyi kabiji wakebelenga kwasa mulunda wa Bataata wajinga panshi na mupenyi, mba amwase ku muchima, kabiji ne Bataata batoleleko lubaji. Kabiji kine yajinga kondo yakatazha, mambo abo, kufumatu ne ku Burkesville, ma mailoshi alepa biingi, batumineko wamizhilo kuya ku Bataata, panyuma ya mbili.

<sup>54</sup> Nanchi awa muntu walajiletu pepi nakufwa. Kyafwainwa kwikala bantu banji bamo babena kuteleka. Amiwa nsakuvuluka jizhina janji, jizhina janji jajinga Will Yarbrough. Abo kape. . . Naketekela bamo baji muno mu California, basongwalume banji. Bino kine wajinga wazama, mwanamulume mukatampe waya bingi kuya, waipaile songwalume wanji na jipulanga japasukako. Nanchi aye—aye wajinga bingi nangovu kabiji muntu wabyubilo byatama. Kabiji kwajinga kulwa kukatampe pakachi kanji ne Bataata. Kabiji ba taata bashi bakepaye awa muntu, nanchi banyemene kufuma mu Kentucky kabiji baabuka mukola kuya ku Indiana.

<sup>55</sup> Kabiji bajinga na mulongo wabo waikalanga, pa kyokya kimye, mu Louisville, Kentucky, wajinga ndondela supulitendati wa Wood Mosaic Saw Mills mu Kentucky, mu Louisville. Kabiji nanchi Bataata baishile na kutana kolojabo. Bataata bajingapo mwanyike pa bonse basongwalume, bajinga baana sevetiini. Kabiji nanchi abo baishile na kutana kolojabo, kabiji kimye kyobaile pepi nobe mwaka umo. Abo kechi bakonsheshe kubwela ne, mambo mizhilo ibakebelenga. Kabiji pano byo twaumwine kwi abo kupichila mu kalata, pa bikilwe jizhina jingi, bino kabiji babujile Bamaama byo bakomvwang'ananga.

<sup>56</sup> Kabiji pano Navuluka juba jimo nsulo (ako kanzubo kacheche) yajingatu kunyuma ya nzubo. Kabiji—kabiji mukyokya kimye panyuma. . . Paji naini. . . leveni bang'ondo bapichilepo pakachi nkami ne mulongo wandondejile, kabiji aye wakikalabilengatu. Kabiji Najinga na jibwe jikatampe mu kuboko kwami, kabiji Amiwa naesekelenga kumumwasha byo Nakonsha kutaya jije jibwe nangovu mumachipa akala, apo nsulo po yapelejile kuya kumututa yalengele mushiji wa machipa. Kabiji Naumvwine kang'onnyi, kaimbilenga kwiulu

ku kinchi. Kabiji Natajile kukyokya kinchi ne kang'onyi katumbukile, kabiji, byo kaubile byoabyo, Jiwi jaambile kwi amiwa.

57 Pano, Nayuka mubena kulanguluka mba kechi Nakonsha kulanguluka ne kuvuluka byoabyo ne. Bino aye Nkambo Lesa Aye Mutonyi, ntanda ne meulu kabiji ne byonse bijiko, byayuka mba Mbena kwamba byakine.

58 Aka kang'onyi, byo katumbukile, Jiwi jaishile kufuma konka ku kinchi kwajinga kang'onyi, nobe mwela wakwatwa mu kipupu, kabiji Jaambile mba, "Obewa ukekala kwipi na muzhi watelwa mba New Albany." Kabiji Naikala, kufuma ku kimye kyo Najinga na myaka isatu kufika pa kino kimye, pepi nobe ma mailoshi asatu kuya ku New Albany, Indiana.

59 Naile na kubuula bamaama pa kikye. Kyawama, abo balangulukile mba Amiwa mbena kulotatu nangwa kintutu kikwabo.

60 Palutwe twavilukile kuya ku Indiana kabiji Bataata baile nakwingijila muntu, Mr. Wathen, muntu noshi. Aye yemwina mukini wa Wathen Distilleries. Kabiji aye ujimo nalubaji lwabaya bingi; aye uji na mamilyoni avula, kabiji ne Louisville Colonels, kabiji—kabiji ne mpila ya kupama na kilapo, kabiji ne bikwabotu. Kabiji nanchi twaikelenga kwipi nakonkakwa. Kabiji Bataata byo bajinga muntu muyaji, nangwa byonkabyo kechi bakonsheshe kwikala kwakubula kutoma kwabo ne, nanchi abo—abo batatwile kulenga wisiki mu—mu mukini.

61 Kabiji nanchi kyaingijile mo kyakosela kwi amiwa mambo Najinga wakomapo pa baana bonse. Amiwa naikele ke wakusenda meema kutwala kuyuwe mukini, pakuuba mba makoilo ekale atalala mu kimye kyo babena kulenga wisiki. Apo ipo po batatwile kupotesha, kabiji abo bajinga na yiye mikini ibiji nangwa isatu. Bino, alo lo lubaji Lombula kukeba kubulang'ana ne, bino kasa kiji bukine.

62 Kabiji Navuluka juba jimo, kufuma ku butala, pakwiya ku nzubo, na kujila. Mambo akwa kunyuma ya mpuzha kwajinga kizhiba, kyajinga . . .po bachibawilanga aishi wachimba. Anweba bavula mwakonsha kuvuluka kimye kyo bachibanga aishi wachimba ne kubika kubunga bufuma pa kuchiba mapalunga. Kyawama, ajo joshinda Mr. Wathen mo balaminanga aishi wachimba mu yoya ntanda. Kabiji Bataata bajinga ba—ba dulaiva babo, dulaiva wupalubaji. Kabiji kimye . . . akye kizhiba kyayujilemo masabi kabiji umvwe kebakebe kuya na kuchiba aishi wachimba ne kuleta babikamo kabiji babika mubunga bufuma pakuchiba mapalunga, pano inge aishi wachimba wasunguluka mu kimye kya kisalo bibwela panshi, kyajinga nobe kyabulamo biko byo Nalanguluka, nobe kizhiba kya aishi wachimba, kabiji be engijishenga,

kechi akutoma ne, kana kutalazha meema, kuzhokolosha ku mambekete abo ne kumukaka wabo, kabiji ne bikwabotu.

<sup>63</sup> Kabiji juba jimo byo natapwilenga meema kufuma kunyuma ya yuwe mpopi, ao wajinga pakachi kamuzhi. Naubilenga kyongo kuboba babulao, mambo Nafumine ku sukuulu kabiji ne bonse basongwalume baile konka ku kizhiba, na kuloba. Natemenwe bingi kuloba. Kabiji batatwile kuya nakuloba kufumyakotu amiwa, ne Amiwa natapwilenga meema a kuyuwe mukini. Onkao mambo, ami, kwajigatu kuzhindama, mambo kechi baswishishe ne. Kabiji Amiwa...Bwikalo bwajinga bwakosa bingi. Kabiji Navuluka byo naishilenga kufuma kokwa na kikumo kyobabena kukumya, kabiji Natolele kipu kya jitaba kyo napombele kikumo kyami pakuba mba kibule kuuba mba kibule kuba lukungu. Mwakikyubapo kala anweba nyi? Mwabikatu kipongwe mushi yakikumo *bibye* ne kuzhokoloka kupombapo lutambo bibye. Kilama kikumo kyobe peulu nobe mutwe wa kovu, mwayukatu, waimana peulu. Anweba mwakonsha kundondela konse Konakonsha kuya, na kikye kipongwe mushi yakikumo kyami; apo po Nakonsha kwikinyata, mwayukatu. Amiwa kechi najingapo na sapato yakumvwala ne. Nanchi kechi twamvwalanga sapato ne, bimye bimo kufika ne pakachi ka kimye kyamashika. Inge twamvwala, atweba... kyajingatu ke byobya byo twakonsha kutola, muntu umo wakonsha kwitupa. Kabiji ne bya kuvwala abyo muntu umo, byobakonsha kwitupa balusa.

<sup>64</sup> Kabiji Naimene mushi ya kikye kinchi, kabiji Naikele monkamwa na kupemashika (kyajinga mu Kainyainya) mambo Nakebelenga kuya nakuloba, Natapwile mambaketi a meema avula bingi kwingijisha tumbaketi twa luzungwe lwa bisali, pepi *nobe* popa, kichika kya galoni, mambo Najingatu mwanyike mucheche wa myaka nobe sebeni. Kabiji Naitulwijienga mu mbekete yabaya ne kubwela jibiji na kusenda mambekete akwabo abiji ne kubwelako, na kwampopa. Aa o meema otwajinga nao. Kabiji bailenga na kupwisha wisiki wavula wafuma kumataba abwa bufuku, aabo bantu ne Bataata, ponka pa nzubo.

<sup>65</sup> Kabiji Najijilenga, kabiji ponkapotu Naumvwine kintu ke kyube kyongo nobe kazhimbiji, kintu kimo nobe bibye (bino, Naketekela kechi kibena kuba kyongyo kyabaya ne), kasa kibena kuya mba “Whooooosssh, whoooooosssh,” kyongo kiji byobyo. Kyawama, kyaletete bingi moyo, kabiji Nakeketele kuzhokoloka. Kabiji mwayuka kinekintu, kazhimbiji kakacheche, Naketekela mwikitela mba kipumpu kya kicheche? Mukimye kya kisalo basenda kupita mu bujimi bwa mataba, mwayukatu, mabula ne bikwabotu, mukimye kya kisalo kokwa, mabula po atatulatu kwaluluka. Kabiji Najinga mushi ya kinchi kya popula, naimene pepi nobe pakachi ka butala ne—ne nzubo. Kabiji Naumvwine kyokya kyongo. Kabiji Nazhokolokele nakukeketa,

kwazhindaminetu nzoo nobe byonka byokiji mukino kibamba. Kafwako nangwa jibula jibena kupupa kuntu kumo ne, nangwa kafwako. Kabiji Nalangulukile mba, “Kwepi kubena kufuma kyokyo kyongo?” Kyawama, Nalangulukile mba, “Kyafwainwa kwikala kwalepa na kuno.” Mwanyiketetu. Kabiji kyailenga na kubailakotu.

<sup>66</sup> Natolele mambakete ami aacheche kabiji napemashikile bimye bicheche kabiji natatwile kuya, Nakokolokelenga. Kabiji Naendelekotu tampulo icheche kufuma popa, kufumatu mushi ya misapi yakikye kinchi kyabaya, kabiji, oo, ami, kyaubile kyongo kyamwela wazhokoloka. Kabiji Naalulukile mba mone, kabiji kuya pakachi peulu ya kinchi pajinga kakwabo kazhimbiji, kyakwachile kinchi na kuzhokoloka na kuzhokoloka, kasa kisukenya mabula. Kyawama, Nalangulukile namba kechi pajipo kintu kyenye pa kikye ne mambo ke kimyetu kya mu mwaka, kabiji ne kisalo, kika, atwa tuzhimbiji potwiya. Tucheche... Twitutela mba “tuzhimbiji.” Kabiji ato—kabiji ato tusenda lukungu. Mwitumona mu kiselebwa byonkabyatu. Kintutu kimo. Nanchi Natajile, bino kechi kyalekele ne. Javula kiletatu moyo pa kimye kicheche, kabiji kyaya, bino kyajinga kokwa pepi nobe mamineti abiji nangwa avulako.

<sup>67</sup> Kyawama, Natatwile kuya jibiji. Kabiji Naalulukile namba tale kukikye ne jikwabo. Kabiji byo Kyaubile, Jiwi ja muntu ja umvwanyiketetu nobe byonka biji jami, amba, “Kechi ukatome, kupepa, nangwa kuzhilulula mubiji obe mujishinda jiji jonse ne. Kukekala mwingilo obe wakwingila byo ukakoma.” Kika, kyandetejile kukeba ne kufwa! Mwafwainwa kulanguluka mwanyike byo ekyumwine. Naponese aa mambakete, kabiji Naile kunzubo lubilo byonka byo Nakonsha kuya, kasa mbijika na jiwi jikatampe.

<sup>68</sup> Kabiji mwajinga mitwe ya mukuba mukyokya kyaalo, miloolo, kabiji baji bingi na bulembe. Bamaama balangulukile mba, pakwiya na kupita kwapela bujimi kapepo Amiwa na imbile kulu kwami mu mutwe wabulembe kabiji banyemejile na nkutundaila. Kabiji Natolokele mu maboko abo, na kutama muteto, kasa ne bapakata ne kwibafyopa. Kabiji baambile mba, “Lukatazho luka, bakukusuma kumuloolo nyi?” Bakeketele mubiji yense.

Naambile mba, “Ine, Maama! Muji muntu mukyokya kinchi kiji kokwa.”

<sup>69</sup> Kabiji baambile mba, “Oo, Billy, Billy! Tuyenga?” Kabiji baambile mba, “Waji kwimana walala nyi?”

<sup>70</sup> Naambile mba, “Ine, maama! Muji muntu mukyokya kinchi, kabiji Aye wajikumbula mba kechi ukatome nangwa kupepa ne.”

<sup>71</sup> “Kutoma mawisiki ne—ne bintu bikwabo.” Kabiji Natapwilenga meema kutwala ku mukini mukyeya kya ng’ondo,

ponkapotu. Kabiji Aye waambile mba, “Kechi ukatome ne nangwa kuzhilulula mubiji obe mujishinda jiji jonse ne.” Abyo ke byubilo byatama, mwayukatu, kabiji mwanami... mwanamulume mucheche na banabakazhi. Kabiji mwaila ami, Amiwa kechi na kizhatwapo nangwa kimye kimo ku kyokyo ne. Aye Nkambo wakwashishe mu bibye bintu, kabiji byo Mbena kuya kulutwe musakutana kuuba mba. Nanchi pano, “Kechi ukatome nangwa kupepa ne, nangwa kwizhilulula mubiji obe ne, mambo kukekala mwingilo obe wakuuba inge wakoma.”

<sup>72</sup> Kyawama, Nabuujiile ba Maama, kabiji—kabiji abo bansekeletu. Kabiji Najingatu wakumya kwakubula kuyuka ne kibena kubiwa ne. Abo baichile dokotala, kabiji dokotala waambile mba, “Kyawama, ujitu na lubazhibazhi, byobyonka.” Nanchi bambikile pamwanya. Kabiji kechi ne kyubilepo, kufuma kujoja juba kufika ne jaleelo, kechi napachilepo mukyokya kinchi ne. Najinga bingi na moyo. Nayanga kulubaji lukwabo lwa bujimi, mambo Nalangulukilenga mba amwa muji muntu mu kyokya kinchi wamba kwi amiwa, jikatampe Jiwi jaambilenga.

<sup>73</sup> Kabiji pano kimye kimo byo papichile ng’ondo umo kufuma popa, Nakailenga kisela kya mabwe na bakasami babacheche, kulutwe ya lubaza. Kabiji ponkapotu Najinga nang’umvino ingi kwiya pe amiwa. Kabiji Nalekele kabiji naikele kulubaji lwa kinchi. Kabiji twajinga kukitulu kya mukola wa Ohio. Kabiji Natajile kuya ja ku Jeffersonville, kabiji Namwene kyaabu kyaimana kukilang’anya byobya, mukola, mukimye kimo kwabuka mukola. Kabiji Namwene banabalume sikisitiini (Ne babajile) abo baponene popa kabiji bataile bumi bwabo pa kyokya kyaabu. Nanyemene bukiji bukiji ne kubuula bamaama, kabiji abo bamwene nobe Nayile na kulala. Bino bekilaminetu mu muchima, kabiji myaka tweti-tuu kufuma popa Kyaabu kya Kafulumende wamanyaunda kino kimye (akyo anweba bavula kyo mwabuka pa kuya kubushiya) kya kilang’anye mukola ponka pa mpuzhatu imo, kabiji banabalume bataile bumi bwabo pa kushimika kyokya kyaabu kukilang’anya mukola.

<sup>74</sup> Kechi kyakakelwepo kwikala kya bukine ne. Byonka byo mubena Kwikimona muno mu kishimikwa, kikala muyekawa musango kimye kyonse.

<sup>75</sup> Pano, balangulukile mba Najingatu na lubazhibazhi. Akyo, Amiwa ne muntu uji nalubazhibazhi, akyo kyakine. Kabiji, inge mwakonsha kumona, bantu baji—baji mulubaji lwa bumupasshi baji nalubazhibazhi.

<sup>76</sup> Talai pabaji nasapawilo ne bangauzhi. Kabiji mwatala neepe William Cowper wanembele lwimbo wayakuwa, “Kuji nsulo yayulwa na Mashi, yafuma ku mishipe yakwa Emanuele.” Bushe mwaki... Anweba mwayuka yewa lwimbo. Naimene ku kilende kyanji kechi papita bimye byabaya ne. Mulongo Julius,



Naketekela, kechi Nayuka ne, ine...ee, abyoy byo, wajinga ne atweba kokwa ku kilende kyanji. Kabiji—kabiji kokakwa, byo apwishishe kunemba lwimbo, kushingwa kwafumine pe aye, waesekele kukeba awa—awa mukola amba eipaye mwine. Monai, Mupashi wafumine pe aye. Kabiji bantu baji nobe bamba sapawilo ne banembeshi kabiji... nangwa ine... Natazha mu bangauzhi.

<sup>77</sup> Talai pe Elaija, byo aimene pa mutumba ne kwita mujilo kufuma mwiulu kabiji waita mvula kufuma mwiulu. Pano kimye Mupashi byo afumine pe aye, wanyemene mambo a kumuchinisha mwanamukazhi. Kabiji Lesa wamutaine wafyama mu lukelo, moba fote palutwe.

<sup>78</sup> Talai pe Yona, kasa aji washingwa bingi kimye Nkambo kyo amushingile mba asapwile momwa mu Ninive, poso mu—muzhi wa bukata bwa St. Louis walapijile na kumvwala masaka. Kabiji pano Mupashi byo afumine pe aye, kika kyamwekele kwi aye? Twamutana peulu ya mutumba panyuma Mupashi byo afumine pe aye, kasa alomba kwi Lesa amba asende bumi bwanji. Kabiji, mwamona, ke kushingwatu. Kabiji bibye bintu inge byaubiwa, byu—byu bapo kintu kimo kwi obewa.

<sup>79</sup> Pano Navuluka byo nakomenenga. Nafikile pa bulumendo. (Nsakupelawizha pa kuuba mba pwishe mu kimye kicheche palutwe.) Byo Nafikile ke mulumendo Najinga na milanguluko nobe bonse balumendo. Na...kuya kusukuulu, Ne batainenga basongwakazhi babacheche. Mwayuka, Najinga bingi wabuvu, mwayukatu. Kabiji Amiwa—Amiwa nakebele songwakazhi wamucheche. Kabiji nobe binse basaongwalume babacheche, pepi nobe myaka fifitiini, Nafwanyikizhatu. Kabiji—kabiji nanchi, oo, wajinga walamba. Ami, wajinga na meso nobe kunda, kabiji wajinga na meno atokato, kabiji shingo nobe ng'onyi wamu meema, kabiji wajinga—wajinga walamba bingi.

<sup>80</sup> Kabiji ne songwalume mukwabo wamucheche, aye... twajinga balunda bingi, nanchi watolele musango wa-T Ford wakala wabashanji, kabiji twalayang'ene na basongwakazhi betu. Kabiji twailenga na kwibatwala kungi, kasa twendesha. Twajinga na yakumaina ya magaloni abiji amafuta. Twasutwile jiwilo jakunyuma na jeke pakuuba mba kipipulwe. Amiwa kechi nayuka ne kana mwikivuluka nangwa ine, mwayukatu, kwikipipula. Bino atweba—atweba twailenga bingi bulongo.

<sup>81</sup> Kabiji nanchi Najinga na bangwe bacheche mu pokochi wami, kabiji twaimene pa kampuzha kacheche ne kutola... mwakonsha kutola shinkwa wakubikamo nyama wa ngwe. Kabiji nanchi, oo, Najinga munoshi, Nakonsheshe kupota bina! Mwamona? Kabiji panyuma ya kuja tubashinkwa twetu ne kutoma Coke, Natatwile kubwezha mabotolo. Kabiji kyajinga kya kukumya kwi amiwa, byo Nalupukile, (banabakazhi pobatatwilengatu kufuma kulusa pakyokya

kimye, nangwa kufuma ku bwanabukazhi) kunda wami wanucheche wapepelenga fwaka.

<sup>82</sup> Kyawama, kimye kyonse Najingatu na milanguluko yami ya mwanamukazhi wakonsha kupepa fwaka, kabiji Amiwa kechi napipulwa nangwa pachechetu kufuma ku kyokya kimye ne. Abyo ibyo. Ke kintu kyapanshi bingi kyo afwainwa kuuba. Kabiji abyo kine ibyo. Kabiji Na—Nalangulukile Na... Bino, kapanyi wafwaka wakonsha kukwata pa kikye, bino, Mbeni kwimubuula, akya ke kyubilo kyakwa diabola. Ke kintu kyakilamo kwipayang'ana kabiji ne boono buji mukino kyaalo. Nakonsha kutemwako songwalume wami kwikala kitomi kukila kwikala pepeshi wafwaka. Abo bo bukine. Nakonsha kutemwa kumona mukazhami kulala panshi, kasa apendwa, kukila kumumona na kasanga. Abyo byo . . .

<sup>83</sup> Pano, awe Mupashi wakwa Lesa uji ne amiwa, inge awa Ye Mupashi wakwa Lesa, (nobe byo mwakonsha kwipuzha), anweba mupepa fwaka muji nalubaji lucheche umvwe mwafika kokwa, mambo akya ke...kimye kyonse. Anweba mwikimona pa pulatifomu, Aye byo ekizhachisha. Ke kintu kyakila mukutama. Ilamai kukikye. Bainetu, inge mwaikala bazhatwa kukyokyo, nasashijila, mu Jizhina ja Kilishitu, fumaiko ku kikye! Kya kemonaua. Kikemwipaya. Kike...kike—ke kaasa wakuyuzha motoka.

<sup>84</sup> Ba dokotala beseka kwimujimuna. Kabiji pano byo bemupotesha byobya bintu! Inge mwaya ku shitolo upotesha michi ne kwaamba mba, “Potai... Mbeni kukeba kupota fifite-seti wa kaasa.” Kika, bakonsha kwiya bebakasa. Bino umvwe mwapota fifite-seti wa mishanga, mubeni kupotatu bintu bimo. Badokotala byobyo bamba. Oo, kino kyaalo kyakonya-na mali. Ke kintu kyatama bingi. Kipayang'ana. Byo kyaitabilwa.

<sup>85</sup> Kyawama, byo Namwene yewa songwakazhi walamba ke obe kyubilo bya musango yewa, awe mushanga mu kuboko kwanji, akyo kyajingatu nobe kyangipaya, mambo Amiwa kine nalangulukilenga mba Namutemwa. Kabiji Nalangulukile mba, “Kyawama...”

<sup>86</sup> Bino, Natelwa mba “ne ushikwa-banabakazhi,” mwayuka kyokyo, mambo Amiwa kimye kyonse nji ubula kuyila mumo na banabakazhi, bino kechi ne anweba Banyenga ne. Amiwa kechi tuyila mumo na mobobila banabakazhi bakatataka ne. Abyo ibyo. Bawama banabakazhi bafwainwa kusendelwa pamo.

<sup>87</sup> Bino Navuluka kimye mukini u bataata kasa a kingila, Amiwa nayanga nakutapula meema ne bintu bikwabo, namonanga bainetu bakwanyike babula kufika pa myaka sebetiini, eitiini, akwa na banabalume ba myaka yami, batoma. Kabiji pakuuba mba bapenduluke kana bebapa koffi ufiti, pakuuba mba bakatekele balume babo ku manzubo kajo kamulajilo. Oo, kintu kimo kyangiyewa musango, Naambile

mba, “Amiwa...” Aye yajinga ng’ambilo yami mukyokya kimye, “Kechi bafikilamo ne kwipaiwa na lupolopolo wabutoto ne.” Abyo ibyo. Kabiji Nashikilwe banabakazhi. Abyo ibyo. Kabiji Nafwainwa kutajisha ng’endo yonse pano, kuchina mba nakatwajijilatu nakulanguluka kintu kimo kya ku mukini.

<sup>88</sup> Nanchi, bino pano, mwanamukazhi wawama ke bunoshi mu muchinya wa mwanamulume. Aye wafwainwa kushingikwa. Aye...Ba maama nobe banabakazhi, mukazhami naye byo anji, kabiji ke batemwikwa. Kabiji Nji na masauzande aba nyenga bena Kilishitu abo bo Napa bingi mushingi. Bino inge—inge bakonsha kunemeka Lesa byo ebalengele, busemi kabiji ke mwiine inamfumu, akyo kijitu bulongo. Aye ke kintu kimo kyakila bingi mukuwama akyo Lesa kyo apana ku mwanamulume, ke mukazhi. Kufumyako lupulukilo, mukazhi ke kintu kyakila bingi kuwama inge waikala mukazhi wawama. Pakuuba inge wabula byobyoy, Solomoni waambile mba, “Mwanamukazhi wawama ke bunoshi mumuchinya wa mulume wanyi, bino awa—awa wabula mushingi nangwa wabula—kuwama ke meema mu mashi anji.” Kabiji abyoy ibyo, ke kintu kyakila mukutama kubiwa. Nanchi mwanamukazhi wawama... Inge uji na mukazhi wawama, mulongo, wafwainwa kumupa mushingi na mushingi wakila. Abyoy ibyo, wafwainwa kuuba kyokyo. Mwanamukazhi wakine! Kabiji, baana, inge muji na semi wakine awa wikala panzubo kabiji weseka kwimulama, kulama byakuvwala byobe byatoka, wakutuma ku sukuulu, kukufunjisha pe Yesu, wafwainwa kunemeka awa semi wawama mukulumpe na kyonse kiji mwi obewa. Wafwainwa kupana mushingi kuyewa mwanamukazhi, ee, mwane, mambo aye ke semi wakine.

<sup>89</sup> Baamba na mambo abulubi bwakubula kutanga mu mitumba ya mu Kentucky. Mwikimona mu yuwe musango wa bukabwa. Bamo mwi abo bamaama bakala banjinga kokwa bafwainwa kwiya kuno ku Hollywood na kwimufunjisha anweba basemi bakatataka byo mwafwainwa kukomesha baana benu. Anweba mulekelela mwanenu waiya bufuku bumo na suki yanyi yalubakana, kabiji mivumbo...mivumbo, (mwibitela mbaka abyoy bintu?) bintu-byalengwa bya kubika mu bilungi byabo, kabiji ne ndeleshi yanyi ivungilatu lubaji lumo, kabiji wajinga ufwapo bufuku bonse, watoma, mulongo, aye wakonsha kufumyapo musapi umo wapeulu wa kinchi kya ikoli kabiji kechi ukafumapo jibiji ne. Ne mubuula, wafwainwa...Kabiji inge mwaikala na bichechetu bya mubyobyoy, kwakonsha kwikala Hollywood wawama kuno, kabiji ke kyaalo kyawama. Abyoy ibyo. Kyakine. “Anweba esekaitu kwikala bukatataka,” abo—abo bo bujimbijimbi bumo bo engijisha diabola.

<sup>90</sup> Pano, awe songwakazhi mucheche, byo Namuntajile, muchima wami walubakene. Kabiji Nalangulukile mba, “Kamulanda mulunda mucheche.”

Kabiji waambile mba, “Oo, ubena kukeba kasanga, Billy?”

Naambile mba, “Ine, maama.” Naambile mba, “Amiwa kechi pepa ne.”

<sup>91</sup> Waambile mba, “Pano, wajikwamba mba kechi uzthane.” Bakebelenga kuya nakuzha kabiji Amiwa kechi nakebele kwikyuba ne. Nanchi baambile mba kuji mazha kokwa, kobatela mba Sycamore Gardens.

Kabiji Naambile mba, “Ine, Amiwa kechi zhaa ne.”

<sup>92</sup> Aye waambile mba, “Pano, kechi uzha ne, kechi upepa ne, kechi utoma ne. Wikala byepi na kisangajimbwe?”

<sup>93</sup> Naambile mba, “Kyawama, Natemwa kuloba kabiji Natemwa bubinda.” Abyo kechi byamuletejile lusekelo ne.

Nanchi waambile mba, “Tola yuwe mushanga.”

Kabiji Naambile mba, “Ine, maama, na kusachila. Amiwa kechi pepa fwaka ne.”

<sup>94</sup> Kabiji Naimene pa kyela kya kujiwilo ja motoka. Bajinga na kyela kya kipabi ku Fords wakala, anweba mwavuluka, kabiji Naimene pa kyela kya kujiwilo ja motoka, naikele ku kipona kya kunyuma, aye ne Amiwa. Kabiji waambile mba, “Walumbulula mba kechi wakonsha kupepa kasanga nenyi?” Waambile mba, “Kabiji atweba basongwakazhi tuji nabalume bwabaya kukila obewa.”

Naambile mba, “Ine, maama, Amiwa kechi naketekela mba Nakonsha kwikyuba kyokyo ne.”

<sup>95</sup> Aye waambile mba, “Kika, obewa wisisi wa mukatampe!” Oo, ami! Nakebelenga kwikala Bill mukatampe watama, nanchi Ami—Ami kine kechi nakebelenga nangwa kimo kya busisi ne. Monai, Nakebelenga kwikala ulwila mali, ao yewajinga mulanguluko wami wa bumi. Nanchi Naambile mba . . . “Sisi! Sisi!”

<sup>96</sup> Amiwa nakakelwe kwimana pa kyokyo, nanchi Naambile mba, “Mpayi!” Natanyikile kuboko kwami, Naambile mba, “Amiwa nsakumuwesha kana Amiwa ne sisi nangwa ine.” Natambwile yewa musanga kabiji natatwile kwambula makishi. Bino, Nayuka mba anweba . . . Bino, Amiwa kechi njina nsambu pabyo mubena kulanguluka ne, Amiwa nsambu yonka kayo ke kubulang’ana bukine. Byo Natatwile kwambula aka nasanga, najinga waswikwa kupepa nobe byonka byo Nakonsha kutola yuwe Baibolo, monai, Naumvwine kintu kimo kasa kibena kuya mba, “Whooooossss!” Naesekele ne jikwabo, Nakakekelwe kumufikizha pa kanwa kami. Kabiji Natatwile kujila, Amiwa akya kintu ne kitaile panshi. Batatwile nkuseka ami. Kabiji Naendele kuya kunzubo, naile kupita mu bujimi, naikele panshi, kasa mbena kujila. Kabiji—kabiji bwajinga bwikalo bwashupa.

<sup>97</sup> Navuluka juba jimo Bataata bailenga kumukola na basongwalume. Mulongo wami ne Amiwa, twasendele bwato ne kuya mwaya mukola, na kukeba mabotolo mwakubika wisiki. Twatambwilenga nikela umo padazeni, pakuya na kwiatola mwaya mukola. Kabiji Bataata bajinga pamo ne amiwa, kabiji bajinga na kimo kyapapakana panshi. . . Naketekela kyajinga pakachi kakuyula mabotolo. Kabiji kwajinga kinchi kyaponene panshi, kabiji Bataata. . . Kabiji awa muntu bajinga nanji, Mr. Dornbush. Najinga na kyanji. . . Aye wajinga na bwato bwawama bingi, kabiji Nakebelwenga mba talwepo bulongo kwi aye mambo Nakebelenga kwingijishako abwa bwato. Bwajinga na kilapo kyawama kabiji bwami kechi bwajinga nakyo ne. Twajingatu na bilapo byakala byakuvuwako. Kabiji inge baswishishe kwingijisha abwa bwato. . . Nanchi, aye waubilenga byakuwelinga kabiji yewalenganga mikini ya Bataata. Nanchi aye. . . Babikile mikupa yabo kukilang'anya kyokya kinchi, kabiji Bataata batwehezhe kuboko kwabo kupokochi wakunyuma ne kufumyamo botolo wa wisiki, kabiji wamupele ne aye watoma, wabwela wapana ku Bataata kabiji ne abo batoma, kabiji abo bamutujile panshi ku mupulapako kulubaji lwa kyoka kinchi kyalupukile. Kabiji Mr. Dornbush wamutolele, ne kwaamba mba, "Tambula, Billy."

Naambile mba, "Nasata, Amiwa kechi toma ne."

<sup>98</sup> Aye waambile mba, "Mwina Branham, ne kutoma ne?" Bonse bafwiletu kasa bamvwala makeke, pepitu. Kabiji aye waambile mba, "Mwina Branham, ne kutoma ne?"

Naambile mba, "Ine, mwane."

"Ine," Bataata baambile mba, "Nakomeshapo sisi umo."

<sup>99</sup> Ba taata kungita amiwa mba sisi! Naambile mba, "Mpai yeo botolo!" Kabiji Nakokeleko kizhiko kwiulu kwakyo, kasa naswikwa kutoma, kabiji byo Natatwile ku mwalulula, "Whooooosssh!" Nabwehezhe botolo kabiji natatwile kuya nakupita mu bujimi nabulume kasa ngya nakujila. Kintu kimo kechi kyaswishishe kwikyuba ne. Mwamona? Amiwa kuuba naamba mba Najinga wawama ne (Najinga waswikwa kwi kyuuba), pakuuba kyajingatu Lesa, lusa, lusa lwakukumya alo lwandamine kubula kuuba byobya bintu. Nakebelenga kwibyuba, amiwa mwine, bino Aye kechi wanswishishe mba ne kyube ne.

<sup>100</sup> Kulutwe Namwene songwakazhi byo Najinga myaka pepi nobe tweti-tuu, wajinga watemwikwa. Wajinga songwakazhi wayanga ku kipwilo kya, German Lutheran. Jizhina janji jajinga Brumbach, B-r-u-m-b-a-c-h, jafumine ku jizhina ja Brumbaugh. Kabiji wajinga songwakazhi wawama. Aye kechi wapepanga nangwa kutoma ne, nangwa—nangwa kechi wazhanga ne nangwa kiji kyonse ne, songwakazhi wawama. Naendeleo nanji mu kakimye kacheche, kabiji Nakonsheshe. . .

Nanchi, pepi nobe tweti-tuu, Napangileko mali afwainwa poso byo Napotele Ford wakala, kabiji Na... twayanga pamo mulumvwang'ano. Kabiji nanchi, akya kimye, kechi kwajingapo kipwilo kya Benaluther pepi ne, bavilukile kufuma ku Howard Park.

<sup>101</sup> Kabiji nanchi bajinga... wamwingilo, yeka wapesheshe amiwa mu kipwilo kya Missionary Baptist, Dokotala Roy Davis. Nyenga Upshaw, yenka watumine Mulongo Upshaw kwi amiwa, nangwa mba ye wisambile nanji pe ami, Dokotala Roy Davis. Kabiji nanchi wasapwijienga, kabiji wajinga na kipwilo kya First Baptist, nangwa akya—akya... Amiwa kechi naketekela mba kyajinga kipwilo kya First Baptist, ne akyo ne, kyajinga Mission... kyatelwa mba kipwilo kya Missionary Baptist ku Jeffersonville. Kabiji wasapwijienga pa kyokya kifulo akya kimye, kabiji twayilenga ku kipwilo bufuku, nanchi... kabiji ne kubwela. Kabiji Amiwa kechi natwelelepo mu kipwilo ne, bino Natemenwetu kuya nanji. Mambo mwine mulanguluko wajinga “wa kuya nanji,” Nafwainwa kwikala wakishika.

<sup>102</sup> Nanchi pa kuya nanji, kabiji juba jimo Na... Aye wafumine ku kisemi kyawama. Kabiji Natatwile kulanguluka mba, “Mwayukatu, mwayukatu, kechi Nafwainwa ku mutaila kimye awa songwakazhi ne. Kechi kiji—kechi kiji bulongo ne, mambo ke songwakazhi wawama, kabiji Amiwa ne muyaji ne—ne Amiwa...” Bataata butuntulu bwa mubiji kechi bwajinga bulongo ne, kabiji Ami—Ami... Kechi kwajingapo jishinda ja kumwenamo bwikalo bwayuwe songwakazhi uji byobya ne, ao wapijijilwe kwikala kunzubo yawama kabiji muji ne machi panshi.

<sup>103</sup> Navuluka machi mutanshi ye Namwene, Amiwa kechi nayukilo byokiji ne. Naendele kuzhokoloka kulubaji. Nalangulukile mba ke kintu kyakila mukuwama kyo Namonapo kala mu bumi bwami. “Bakonsha kubika byepi kintu kiji byobya panshi?” Wajinga machi mutanshi ye Namwenepo. Wajinga—wajinga umo wabibye... Naketekela kitelwa mba “machi umweka nobe mwemba.” Nakonsha kwikyambila mungi. Kintu kiji nobe “kipikulo” nangwa kintu kimo kyo banungila pamo, kabiji kiji panshi. Kyawama kya mazhamatamba ne kichila, kabiji ne byachiluluka bikatampe bya bikwa pakachi, mwayukatu. Kyajinga kintu kyawama bingi.

<sup>104</sup> Kabiji nanchi Amiwa navuluka Na—Nafukwile mba kyawama Namwipuzha na musongola, nangwa Naleka ne kuleka muntu wawama umo wamusongola, muntu umo wakonsha kwikala bulongo nanji, wakonsha kumulengela bwikalo kabiji wakonsha kwikala walusa kwiaye. Amiwa nakonsha kwikala walusa kwiaye, bino Na—Na—Nalengelengatu tweti seti pa awala umo. Nanchi Amiwa kechi nakonsha kulenga bwikalo bwanji bwawaina bulongo ne. Kabiji Ami... Nakisemi kyonse kyotwasunganga, kabiji

Bataata butuntulu bwa mubiji kechi bwajinga bulongo ne, kabiji Nasungangatu bonse pamo, nanchi Najinga na kimye kyakosa bingi.

<sup>105</sup> Nanchi Nalangulukile mba, “Kyawama, kintutu kyo nakonsha kuuba ke kubuula mba Na—Na...aye...Amiwa—Amiwa kechi nakonsha kwibwelamo ne, mambo Nalangulukile kyakosa bingi pa konauna bwikalo bwanji kabiji ne kumuleka aye kasa akosamika amiwa.” Kabiji pano Nalangulukile mba, “Inge muntu umo wakonsha kumona ne kumusongola, balenga nzubo yawama. Kabiji kape inge kechi Nakonsha kumusongola ne, Nakonsha—Nakonsha kuyuka mba uji nalusekelo.”

<sup>106</sup> Kabiji nanchi Nalangulukile mba, “Ami—Ami kuuba—Namuleka ne!” Kabiji Na—Najinga wakatazhiwako. Kabiji pajuba pajuba Nalangulukilenga pa kikye. Nanchi Najinga wabuvu bingi pakuuba mba namwipuzhe amba namusongole. Kila bufuku Nafukulanga mu milanguluko yami mba, “Amiwa kamwipuzha.” Kabiji, Ami inge, uu, kyokika kya, kuyatu bukiji bukiji, nangwa kintu kimo kyo mutambula...? Bonse balongo benu bajiiiko kape bapichile mu kintu kimo. Kabiji ke ngumwino yatama, kilungi kyami ke kikabe. Amiwa—Amiwa kechi nayukile ne. Amiwa kechi na musolomokele ne.

<sup>107</sup> Nanchi Nalanguluka mba mubena kukumya kana Nasongwele byepi. Mwayuka kine kintu nyi? Namunembejile kalata ya kumwipuzha. Kabiji nanchi aye...Pano, kechi kyajinga mba “mutemwe Inetu,” kyajinga kyakilako pacheche (mwayukatu) kulubaji lwa butemwe kukila pa kyokyo. Kechi kyajingatu kya—kyakulayang’ana ne, kyajinga...Amiwa—Amiwa ne kinembele, mu buwame mo Nakonsha kubila.

<sup>108</sup> Kabiji Najinga na moyo mucheche na mambo aba inanzi. Bainanji bajinga...abo bajinga bashupako. Kabiji, bino bashanji bajinga mukulumpe walusa mwanamulume waki Dutch, mulongo wakikulumpe wawama. Aye wajinga wakubungizha balongo nabalongo, bantu bengijila kusitima, ba mungyangi, bapangilenga pepi nobe faivi aduleendi madola pa ng’ondo mu byobya bimye. Kabiji amiwa kasa ndengatu maseti tweti pa awala umo, kusongola mwananji wamukazhi. Uh! Nayukile mba akyo kechi kyakonsha kwingila ne. Kabiji bainanji bajinga bingi...Bino, wajinga inetu wawama. Kabiji aye—aye wajinga umo wabooba bapeulu, mwayukatu, kabiji aba bapeulu, mwayukatu, kabiji nanchi kechi bajingapo na kintu kimo kyakutamo mwi amiwa ne. Najingatu wamusango wakala wabooba banji nangikelo ya mungye, kabiji aye walangulukilenga mba Hope wafwainwa kwenda na songwalume ujiko peulu, kabiji Na—Na—Nalanguluka mba wajingatu bulongo. Kabiji nanchi...Bino Ami—Ami kechi ne kilangulukile pa kyokya kimye ne.

109 Nanchi Nalangulukile mba, “Kyawama, bino, kechi Nayuka mwakwikyubila ne. Amiwa—Amiwa kechi nakonsha kwipuzha bashanji ne, kabiji Amiwa—Amiwa kine kuuba naipuzha bainanji ne. Kabiji nanchi Nafwainwa kumwipuzha aye mwine patanshitu.” Nanchi Nanembele kalata. Kabiji alwa lukeelo byo nayilenga mu mukwakwa kukito, Neiponeshe muposhitala. Aa makalata. . . Twayilenga ku kipwilo bufuku Pakisatu, kabiji aja jajinga Pakimo lukeelo. Amiwa naesekele Pamulungu juba jonse amba Mbena kukeba kusongola, kabiji kechi Nakonsheshe kuchichika bulongo ne.

110 Nanchi pano Neiponeshetu muposhitala. Kabiji ku kito pajoja juba Nalangulukile mba, “Ibyepi inge bainanji bakwata yoya kalata?” Oo, ami! Apo Nayukile mba nishi Naonaunwa inge—inge bakwata yoya kalata, mambo abo kechi bateleko muchima kwi amiwa ne. Kyawama, Nasulwijilengatu mukachi.

111 Kabiji apa Pakisatu bufuku byo Naishile, oo, ami, Nalangulukile mba, “Momwepi Amiwa mokailako? Inge bainanji bakwata yoya kalata bakakanya, nanchi Naketekela mba wiitambula.” Amiwa neinembele kwi “Hope.” Ajo jojanjinga jizhina janji, Hope. Kabiji nanchi Naambile mba, “Neinembetu kwi Hope.” Kabiji nanchi. . . Kabiji Nalangulukile mba kape kechi wiitambula ne.

112 Nanchi Nayukile bulongo kwimana pangye ne kwita mulusengo pakuuba mba aye alupuke pangye. Oo, ami! Kabiji yense songwalume wabula kuchichi kuya kunzubo na kukokosha pa kibelo ne kwipuzha songwakazhi ne, kechi uji namwingilo wakwingila nanji nangwa byonkabyo ne. Abyo kine ibyo. Ako ke kukosama bingi. Kafwamo munema ne.

113 Kabiji nanchi Naimikile Ford wami wakala, mwayukatu, kabiji Namuwamishe bulongo. Kabiji nanchi Naile na kukokosha ku kibelo. Lusa, bainanji bobaishile ku kibelo! Amiwa nakakelwe ne kupeema, Naambile mba, “Muji—muji—muji byepi, Mrs. Brumbach?” Ee.

114 Abo baambile mba, “Uji byepi, William.”

Nalangulukile mba, “Uu-oo, ‘William’!”

Kabiji—kabiji waambile mba, “Musakutwela nyi?”

115 Naambile mba, “Nemusachila.” Natwelele mukachi ka kizhilo. Naambile mba, “Bushe Hope winengezha nyi?”

116 Kabiji ponkapotu Hope waishile nakukilauka monka munzubo, songwakazhi ujitu na myaka pepi nobe sikisitiini. Kabiji aye waambile mba, “Byepi, Billy!”

117 Kabiji Naambile mba, “Byepi Hope.” Kabiji Naambile mba, “Mwinengezha kuya ku kipwilo nyi?”

Aye waambile mba, “Pembelakotu mineti umo.”



118 Nalangulukile mba, “Oo, ami! Kechi wiitambula ne. Kechi wiitambula ne. Kyawama, kyawama, kyawama. Hope naye kechi wiitambula ne, nanchi kisakwikalatu bulongo, mambo inge wikyamba konji.” Nanchi Naumvwinetu bulongo.

119 Kabiji byo Nakafikile ku kipwilo, Natatwile kulanguluka mba, “Ibyepi inge wiitambwile?” Mwamona? Kabiji kechi Naumvwine byaambilenga ba Dokotala Davis ne. Natajile kwi aye, kabiji Nalangulukile mba, “Kapepo wiikifyatu, kabiji usakumbuula mba kileke inge Nalupuka pangye, mambotu akumwipuzha kyokyo.” Kabiji kechi Naumvwinenga byaambilenga Mulongo Davis ne. Kabiji—kabiji Namuntajile, kabiji Nalangulukile mba, “Ami, Nashikwa kumuleka, bino . . . Kabiji Na—Na . . . kyakushinawina pano kyaiya.”

120 Nanchi pakwisha kupwila twatatwile kwendela pamo mu mukwakwa, kasa tuya kunzubo, kabiji—kabiji nanchi twaendejiletu pamo kuya ku Ford wakala. Kabiji nanchi kimye kyonse ng’ondo wasamine bingi, mwayukatu, Namutajile wajinga walamba bingi. Mulongo, Natajile koanji, kabiji Nalangulukile mba, “Ami, byo Nakonsha kutemwa kwikala nanji, bino Naketekela kechi kyakonsheka ne.”

121 Kabiji nanchi Naendeleko palutwe kacheche, mwayukatu, kabiji Namutajile ne jikwabo. Naambile mba, “Waumvwa—waumvwa byepi bufuku bunu?”

Waambile mba, “Oo, Njitu bulongo.”

122 Kabiji twaimikile awa Ford wakala kabiji twatatwile kulupukamo, mwayukatu, kuzhoka kulubaji lukwabo, kwenda kuya nakuchipuka kuya kunzubo kwabo. Kabiji Naendelenga kuya ku kizhilo nanji. Nalangulukile mba, “Mwayukatu, aye kape kechi watambwile kalata ne, nanchi Kyawama nalubakotu. Amiwa njina mulungu mukwabo wakubilwa lusa nangwa byonkabyo.” Nanchi Naumvwine bingi bulongo.

Aye waambile mba, “Billy?”

Naambile mba, “Ee.”

Aye waambile mba, “Natambwile kalata yobe.” Oo, ami!

Naambile mba, “Mwatambwile nyi?”

123 Aye waambile mba, “Uh-uu.” Kyawama, watwajijiletu nakuya kulutwe, kechi waambilepo kyambo kikwabo ne.

124 Nalangulukile mba, “Mwanamukazhi, mbulepo kintu kimo. Mpangishe nangwa umbulepo kintu kimo kyo walanguluka pa kikye.” Kabiji Naambile mba, “Bushe obewa—bushe obewa wiitangile nyi?”

Aye waambile mba, “Uu-uu.”

125 Ami, mwayukatu mwanamukazhi byoakonsha kukushatu nakupembelela. Oo, Ami—Amiwa kechi ne kitazhizhe muyeo musango ne, mwamona. Mwamona? Bino, nangwa byonkabyo,

mwayukatu, Na—Nalangulukile mba, “Kika kyo wabujila kumbulapo kintu kimo?” Monai, kabiji Natwajijiletu nakuya kulutwe. Naambile mba, “Bushe wiitangile yonse nyi?”

Kabiji aye. . . [Kafwapo biji patepu ne—Waku.] “Uu-uu.”

<sup>126</sup> Nanchi twajingatu pepi kufika pa kibelo, kabiji Nalangulukile mba, “Mulunda, kufikizha pa kukokolokela ne, mambo kape kuuba Nanyema kwibashamo ne, nanchi mbuletu ponka pano.” Kabiji nanchi Natwajijiletu nakupembelela.

<sup>127</sup> Kabiji aye waambile mba, “Billy, Nakonsha kutemwa kuuba kyokyo.” Waambile mba, “Amiwa nakutemwa.” Lesa apeshe mweo wanji, aye uji Mulukumo. Aye waambile mba, “Nakutemwa obewa.” Waambile mba, “Nalanguluka mba tubuule basemi yetu. . . basemi pa kikyee. Kechi walanguluka byobyonyeni?”

<sup>128</sup> Kabiji Naambile mba, “Mutemwe, teleka, twayai tutatule kikyee kasa twikimika pa fifite-fifite.” Naambile mba, “Amiwa nsakubuula bashobe inge obewa wabuula bainobe.” Kupana lubaji lwatama kwi aye, nobe kyakutatwilapotu.

Aye waambile mba, “Kijitu bulongo, inge Bataata baikala batanshi kubuula.”

Naambile mba, “Kijitu bulongo, Amiwa ke babuula Pamulungu bufuku.”

<sup>129</sup> Kabiji nanchi Pamulungu bufuku bwafikile, Namubwezhezhe kunzubo kufuma ku kipwilo kabiji Na. . . Aye watwajijiletu na nkutala. Kabiji Natajile, kabiji kimye kyajinga naini-sate, kyajinga kimye kyami kyakutatulako kuya. Nanchi Charlie waikela ku tebuulu wanji, kasa ataipa. Kabiji ba Mrs. Brumbach baikele byobya mukoona, kasa babena kutunga na mashinyi, mwayukatu, nangwa totwa tubichi twapikakana kwakubika bintu, mwayukatu. Amiwa kechi nayuka byo mwitutela ne. Kabiji baubilenga kimo kyapabyobya bintu. Kabiji Hope watwajijiletu na nkutala, kabiji wamwesheshenga pa kilungi, mwayukatu, kasa atazha ku bashanji. Kabiji Ami. . . Oo, ami! Nalangulukile mba, “Ibyepi inge waamba mba, ‘Ine?’” Nanchi Natatwile kuya ku kibelo, Naambile mba, “Kyawama, Naketekela kyafwainwa Amiwa kuya.”

<sup>130</sup> Kabiji Naendele kuya ku kibelo, kabiji—kabiji aye watatwile kuya kukibelo pamo ne amiwa. Aye kimye kyonse waiyanga ku kibelo nakumbuula mba “bukiji bufuku.” Nanchi Ntatwile kuya ku kibelo, kabiji aye waambile mba, “Kechi usa kumubuula aye nenyi?”

<sup>131</sup> Kabiji Naambile mba, “Hu!” Naambile mba, “Amiwa kine mbena kweseka, bino Ami—Ami—Ami kechi nayuka mo Nakonsha kwi-kyubila ne.”

<sup>132</sup> Kabiji aye waambile mba, “Amiwa nsakubwelatu na kwibeta balupuke.” Nanchi aye wabwelele panyuma kabiji wanshile kasa naimana ponkapa.

Kabiji Naambile mba, “Charlie.”

Aye waalulukile kutala kunyuma ne kwaamba mba, “Ee, Bill?”

Naambile mba, “Bushe Nakonsha kwisambako nenu pa mineti umo nyi?”

<sup>133</sup> Aye waambile mba, “Kine.” Aye waalulukile kufuma ku tebulu wanji. Mrs. Brumbach wamutajile, wabwela watala ne kwi Hope, kabiji wabwela wantala ne amiwa.

Kabiji Naambile mba, “Mwakonsha kulupuka pa kukokolokela nyi?”

Kabiji aye waambile mba, “Ee, Nsakulupuka.” Nanchi aye walupukile kuya mwakokolokela.

Naambile mba, “Kine ke bufuku bwawama, kechi ibyo nenyi?”

Kabiji aye waambile mba, “Ee, byobuji.”

Naambile mba, “Kine kwaikala kwakaba.”

“Kine byokiji,” aye watajile.

<sup>134</sup> Naambile mba, “Naingila bingi nangovu,” Naambile mba, “mwayukatu, ne maboko ami abena kushubuluka.”

Aye waambile mba, “Wakonsha kumutambula, Bill.” Oo, ami! “Wakonsha kumutambula.”

<sup>135</sup> Nalangulukile mba, “Oo, akyo kyawama.” Naambile mba, “Obewa kine mwasumininwa nyi, Charlie?” Aye waambile mba . . . Naambile mba, “Charlie, tala, Nayuka mba awe ke mwanenu wamukazhi, kabiji anweba muji na mali.”

<sup>136</sup> Kabiji aye watanyikile kuboko kwanji ne kukwata pa kuboko. Aye waambile mba, “Bill, teleka, mali kechi kyokintu kyoka kiji mubumi bwa muntu ne.” Aye waambile mba . . .

<sup>137</sup> Naambile mba, “Charlie, Amiwa—Amiwa mpangatu maseti tweti pa awala umo, bino Namutemwa kabiji ne aye watemwa. Kabiji Mbeni kukulaya, Charlie, amba Amiwa kengila poso bibye . . . mabobela akafumemo mu maboko ami, pakuuba mba na munengezhezha bwikalo. Amiwa kekalatu wakishika kwi aye byonka byo Nakonsha kwikala.”

<sup>138</sup> Aye waambile mba, “Naketekela kyokyo, Bill.” Aye waambile mba, “Teleka, Bill, Nakeba kukubuula.” Waambile mba, “Mwayuka, lusekelo, kechi kisendatu mali pakuuba mba muntu ekale na lusekelo ne.” Waambile mba, “Waikalatu wawama kwi aye. Kabiji Nayuka mba ukeyyuba.”

Naambile mba, “Nakusachila, Charlie. Amiwa kine kooba kyokyo.”

<sup>139</sup> Pano kyajinga kimye kyanji kya kubuula Bamaama. Kechi nayuka byo bekyubile ne, bino twisongwele.

<sup>140</sup> Nanchi, byo twisongwele, kechi twajingapo nakintu kimo, kafwako nangwa kimo kyakulama nzubo ne. Naketekela twajinga na madola abiji nangwa asatu. Nanchi twatwile kusonkela nzubo, yalipijilwenga madola foolo pa ng'ondo. Yajinga icheche, mpuzha yakala ya malumu-abiji. Kabiji muntu umo witupele mwanya wakala wakuchimpa. Nakumya kana pajipo umo wamonapo mwanya wakala wakuchimpa? Kabiji betupele kyokyo. Kabiji Naile ku Sears ne ku Roebucks ne kupota telu wamucheche wabipona foolo, kabiji kechi—kechi wajinga wakupeta ne, mwayukatu, kabiji twatambwile pakimye kyaitabilwa. Kabiji nanchi pano Naile kuba Mr. Weber, bapotesha bintu byakala, kabiji twakapotele kitofu kyakwipikapo. Nalipijile maseti sebete-faivi pakyokya, kabiji dola umo ne kintu kikwabo kyakutetekapo. Twatwile kulama nzubo. Navuluka kutola ne kupenta pa bipona, byo Nebipetele. Kabiji, oo, twajinga balusekelo, nangwa byonkabyo. Twajinga umo na mukwabo, pakuuba mba byonse bikale byafikilamo. Kabiji Lesa, konkwa ku lusa Lwanji ne buwame Bwanji, twajinga nzubo yamasongola yabacheche yakila mulusekelo panopantanda.

<sup>141</sup> Natana kikyeye, lusekelo kechi luji mukuvula kwa bintu bya muntanda byo uji nabyo ne, kana kutondwa kobe na bintu byonka byo uji nabyo.

<sup>142</sup> Kabiji, pakupitapo kimye kicheche, Lesa waishile na kupesha nzubo yetu icheche, twaikele na songwalume mucheche. Jizhina janji jajinga Billy Paul, uji monka muno kino kimye. Kabiji palutwe kacheche kufuma popa, pepi nobe bang'ondo leveni, Aye witupesheshe ne jikwabo na kasongwakazhi kacheche katelwa mba Sharon Rose, kufumya ku kyambo kya "Awa Loozi wa Kushalon."

<sup>143</sup> Kabiji Navuluka juba jimo Nasungile mali kabiji Nailenga na kukokoloka pacheche, kuya ku mpuzha, Kizhiba kya Paw Paw, kuya nakuloba. Kabiji pakubwela mujishinda . . .

<sup>144</sup> Kabiji mukyonka kye kimye . . . Nashapo kwaluluka kwami. Amiwa naalulukile. Kabiji naikajikilwe kwi Dokotala Roy Davis, mu kipwilo kya Missionary Baptist, kabiji naikele wamwingilo ne kwikala na tabbanako amo Amiwa mosapwila ku Jeffersonville. Kabiji Naikele kafunga wa kipwilo kicheche. Kabiji Ami . . .

<sup>145</sup> Kwakubula mali, Nafungilenga kipwilo pa myaka sebetiini kwakubala kutambulako nangwa peni umo ne. Amiwa kechi naketekela mu kutamb- . . . Kechi mwajingapo nangwa nsanyi ya kilambwilo ne. Kabiji bya bujikumi byo Najinga nabyo kufuma kukinto, kabiji ne bikwabotu, twajinga na kibokoshi kicheche kunyuma ya kishimikwa, panembwa, kiyukilo kicheche ponka,

“Monka mo mwaubila ku umo wababo babacheche Bami, mwikyuba kwi Amiwa.” Kabiji pano abyo kipwilo byobyo kyalipijilwenga. Twajinga na kongole ya kulipilwa pa myaka-teeni, kabiji yalipijilwe kufika pepi na myaka ibiji. Kabiji Amiwa kechi natambwilepo bupe buji bonse ne.

<sup>146</sup> Kabiji pano Najinga, oo, na madola acheche o Nasungile pakuya na kukokoloka. Aye waingilanga, ne aye, pa Mukini wa Fine Shirt. Wabudemwe watemwikwa songwakazhi. Kabiji kilende kyanji kape kyauba mabebe leelo, bino aye ukijitu mu muchima wami. Kabiji Navuluka byo aingijile nangovu nkukwasha amiwa kwikala na mali afikilamo kuyila ku kiky kizhiba na kuloba.

<sup>147</sup> Kabiji byo Nabwelelenga kufuma ku kizhiba, Natatwile kumona, pa kwiya ku Mishawaka ne ku South Bend, Indiana, kabiji Natatwile kumona myotoka yajinga nabiyukilo kunyuma, amba, “Yesu Yenkatu.” Kabiji Nalangulukile mba, “Akye kyaumvwanika ke kyenye, ‘Yesu Yenkatu.’” Kabiji Natatwile kumona bibye biyukilo. Kabiji byajingatuponseponse kutatwilatu ku makinga, ma Fords, Cadillacs, kabiji bikwabo-tu, “Yesu Yenkatu.” Kabiji Nalondejilepo imo, ne ayo aishile kufika ku kipwilo kikatampe. Kabiji Nataine kuuba mba bajinga ba Pentekosito.

<sup>148</sup> Naumvwine lwa ba Pentekosito, bino bajinga jibumba ja “balang’ana-bazhila aba balala panshi kabiji ne kapofu ku byatunwa byabo,” kabiji ne byonse byo bambujile pa abo. Nanchi kechi Najingapo na kintu kimo kyakuuba nakyone.

<sup>149</sup> Nanchi Nebomvwine kasa babena kuuba bintu momwa, kabiji Nalangulukile mba, “Naketekela Nsakutwelatu mukachi.” Nanchi Naimikile Ford wami wakala kabiji nakatwelele mukachi, kabiji ne ng’imbilo yonse yomwakonsha kumvwa mubumi bwenu! Kabiji Naishile kutana mba kwajinga bipwilo bibiji bikatampe, kimo kyatelwa mba P.A. wa J.C., kabiji ne ba P.A. wa W., anweba bantu bavula mwakonsha kuvuluka twakala tubung-. . . Naketekela mba bakwatakana, byo batelwa pakino kimye, kabiji batelwa mba kipwilo kya United Pentekosito. Kyawama, Natelekele ku bamo bafunjishi babo. Kabiji baimene byobya, oo, bafunjishenga pe Yesu kabiji ne Aye byojinga mukatampe, kabiji ne bintu byonse byajinga bikatampe, kabiji ne pa “lubatizhilo lwa Mupashi Wazhila.” Nalangulukile mba, “Kika kyo babena kwambapo?”

<sup>150</sup> Kabiji, pakupitapo ka kimye, muntu umu watolokele ne kutatula kwamba na jimi. Kyawama, Amiwa kechi naumvwinepo kintu kimo kya yewa musango mu bumi bwami ne. Kabiji kwaiya mwanamukazhi umu kupita mukachi kasa abena kunyema lubilo. Nanchi bonse baimene batatwile ne kunyema. Kabiji Nalangulukile mba, “Kyawama, mulongo, kine kechi bajipo na maana a mukipwilo ne!” Kujila ne kubijika

kabiji ne bikwabotu, Nalangulukile mba, “Ng’anyi jibumba je!” Bino, mwayukatu, kintu kimo pa kikye, monka mo Nabajijile momwa, momonka ne kutemwa kwami Mokwayijilenga nakubailako. Kwajingapo kintu kimo kyamwekele kuwama bingi. Kabiji Natatwile kwi bamona. Kabiji kyangwajijiletu. Nalangulukile mba, “Nsakushipikishakotu pa kimye kicheche, mambo Amiwa. . . Amiwa njikwipi na kibelo. Inge kintu kimo kyatatula kya bukiji bukiji, Amiwa nsakulupukila ku kibelo. Nayuka kuji motoka wami, pepitu pa koona.”

<sup>151</sup> Kabiji Natatwile kumvwa bamo basapwishi, bajinga bafunda ne baana bamasukuulu. Kika, Nalangulukile, “Akyo kyawama.”

Nanchi kimye kya kajo kamulajilo kyafikile, kabiji baambile mba, “Muntu yense eye aje kajo kamulajilo.”

<sup>152</sup> Bino Nalangulukile mba, “Pembelelaiko pacheche. Njina dola umo ne maseti sebete-faivi akuyila ku nzubo, kabiji Ami. . .” Oo onka o Najinga nao mali a petelo. Najingatu nao a kutwala kumuzhi. Kabiji Najinga na Ford wakala, wajinga wawama bingi Ford wakala. Kechi yajinga yakubwela panyuma ne, yajingatu pamo nobe yuwe papo, yakokobokeletu. Kabiji kyajinga. . . Amiwa kine naketekela mba Ford wakonsha kuya sate mailoshi pa awala umo, bino mambotu akuuba mba kyajinga fiftiini *mumwe* kabiji fiftiini *mumwe*. Mwamona, kwibibika pamo, muji na sate. Kabiji nanchi kyajinga. . . Nalangulukile mba, “Kyawama, abwa bufuku Nalangulukile mba Nakonsha kufumako panyuma ya. . .” Amiwa naikele kupwijilo ya bufuku.

<sup>153</sup> Kabiji, oo, aye waambile mba, “Bonse bo basapwishi, kechi namamba adinominesheni kobaji ne, baishile ku pulatifomu.” Kyawama, kwajinga pepi nobe tuu aduleendi ba atweba kokwa, Naikele kokwa. Kabiji nanchi aye waambile mba, “Pano, kechi tuji na kimye kya anweba bonse mba musapwile ne.” Aye waambile mba, “Imanaitu mwiye kuno mwambe kana anweba yenu bang’anyi kabiji ne komwafuma.”

<sup>154</sup> Kyawama, kyafikile pa kimye kyami, Naambile mba, “William Branham, Baptist. Jeffersonville, Indiana.” Napichile.

<sup>155</sup> Naumvwine bonse bashala kwitela abo bene, “Pentekosito, Pentekosito, Pentekosito, P.A. wa W., P.A.J.C., P.A.W., P. . .”

<sup>156</sup> Amiwa naedeleko. Nalangulukile mba, “Kyawama, Naketekela mba Amiwa yami mwaana jimbata wabula kumweka bulongo.” Nanchi Naikele panshi, nkepembelele.

<sup>157</sup> Kabiji, aja juba, bajinga na bawama, basampwishi bakwanyike bajingako, kabiji basapwijile bingi nabulume. Kabiji pano baambile mba, “Umo usakuleta mbila bufuku buno ke. . .” Naketekela bamutelelenga mba, “Eloda.” Kabiji ba mwingilo baabo, mukifulo kya “Reverend,” kyajinga mba “Eloda.” Kabiji baletetele mwanamulume mukote wachiluluka, kabiji

aye wajinga na kochi umo wamusango-wakala wa basapwishi. Naketekela mba anweba kechi mwakimonapo umo ne. Walepa kisusu-kya nkunda kunyuma, mwayukatu, na teneshi ya kisapi kyaboyaboya, kabiji aye wajingatu na suki itoka icheche yazhokoloka mutwe. Kamulanda mulongo mukote, walupukile nobe *bibye*, mwayukatu. Kabiji aye waimene popa wabwela wazhokoloka. Kabiji apo bonse basampwishi basapwijilenga pe Yesu ne bukata. . . kabiji ne bukata Bwanji, kabiji ne bikwabotu, awa mwanamulume mukote watolele kibaba kyanji kufuma mwi Yoba. “Wajingapi byo Naajile kitendekesho kya ino ntanda, nangwa kimye bataanda ba kumakya byo baimbile pamo kabiji ne baana bakwa Lesa byo babijikile na lusekelo?”

<sup>158</sup> Kabiji awa kamulanda mulongo mukote, Nalangulukile mba, “Kika kyo bakubujila kubikako bamo balongo bakyanyike amba basapwile?” Kikatampe. . .mpuzha mwayujile bantu ponse ponse. Kabiji Nalangulukile mba, “Kika kyo bajikubila kyokya?”

<sup>159</sup> Nanchi pano awe mulongo mukote, mukifulo kya kusapwila byaubiwenga panopantanda, aye watatwile kusapwila bibena kubiwa Mwiulu kimye kyonsetu. Kyawama, aye Wamutolele kufuma ku ntendekelo—ku ntendekelo ya kimye, kabiji Wamuletele kubwela ku Kwiya kwa Bubiji pa kakongolo ka kimbakana. Kika, Amiwa kechi nakyumvwapo akwa kusapwila mu bumi bwami ne! Pakyonka kya kimye Mupashi wamukwachile, aye watolokele kufika nobe *popa* peulu kabiji wakumakanya ne tushiko pamo, wataile mapuzhi anji kunyuma kabiji waile kasa endela kunung’unu pa kufuma ku pulatifomu, yaambile mba, “Anweba kechi mujipo na mpuzha yabaya kuno yakuuba mba amiwa na sapwilapo ne.” Bino wajinga na mpuzha yabaya kukila yo Njinayo kuno.

<sup>160</sup> Nalangulukile mba, “Inge Akya kyakonsha kulengela mwanamulume mukote kuuba byobya, kya konsha Kuuba byepi inge Kyaiya pe amiwa?” Na—Nalangulukile mba, “Kape Amiwa Mbeni kukabila bimo bya Mukyokya.” Kika, aye byo aishile kokwa, Namumvwijile bingi lusa awa mulongo mukote. Pakuuba, aye byo afumineko, Amiwa ne umvwijilenga lusa amiwa mwine. Kabiji Namumwene kasa abena kufumako.

<sup>161</sup> Nalupukile abwa bufuku, kabiji Nalangulukile mba, “Pano, lukeelo lukalondelapo Amiwa kechi nkabala muntu uji yense kuyuka kwepi, nangwa Yami ng’anyi.” Nanchi Naile, kabiji abwa bufuku Nakishile mutoloshi ami. Natolele. . .naile mubujimi bwa mataba nakulala, kabiji Naile nakupota tubashinkwa twami twalepuluka. Anweba. . .Napoteletu yense mulumba na kangwe kamo. Kwajinga patu konkakwa, po Natapwile meema. Nanchi Nayukile mba abya byakonsha kundama pa kakimye kacheche, nanchi Natapwile ne kutoma, kabiji naile nakuja tubashinkwa twami twalepuluka. Kabiji nabwelele na kutoma meema. Naile mubujimi bwa mataba, nasendele bipona bibiji

kabiji nabikilepo tolosi wami mucheche wamingalalangwa ponka, kabiji ne kushakaminapo pa kipona.

<sup>162</sup> Kabiji, abwa bufuku, Nalombele bingi pepi nobe bufuku bonse. Naambile mba, “Nkambo, kyokika kye kyo Natwelamo? Amiwa kechi na kimonapo bantu banji na bupopweshi bwamusango yewa mubumi bwami ne.” Kabiji Naambile mba, “Nkwashi ami kuyuka kana kyokika kye.”

<sup>163</sup> Kabiji lukeelo lwalondejilepo Naileko. Betwichele atweba ku kajo ka kwiaula. Nangwa byonkabyo, Amiwa kechi naishile nakuja nabo ne, mambo kechi Najingapo na kintu kyakubikamo mukilambwilo ne. Kabiji Nabweletu. Kabiji lukeelo lwalondejilepo byo Natwelele mukachi, kika (Najile tumo tubashinkwa twami), kabiji naikala ne kwikala. Kabiji baile ku maikolofoni. Kabiji Amiwa kechi nakimwenepo maikolofoni kala ne, kabiji Najinga na moyo wakyokya. Nanchi abo...Kabiji kyajinga na kalutambo kacheche kakobamine peulu, kabiji ne watala panshi. Umo watwela mu kyakwambilamo, nobe. Kabiji aye waambile mba, “Bufuku bwapita, pa pulatifomu, pajinga musapwishi mwanyike pano, waki Baptist.”

Nalangulukile mba, “Uu-oo, Amiwa kyangwaminatu kwingila-nakutwajijila.”

<sup>164</sup> Kabiji aye waambile mba, “Aye ye wajingapo mwanyike pa pulatifomu. Janji jizhina jajinga Branham. Kujipo umu wayuka kooanji aye nyi? Mubuulai eye kuno, twamukeba mba alete mbila yalukeelo luno.”

<sup>165</sup> Oo, ami! Namvwajile Ka-sikipa kacheche, ne katoloshi kamingalalangwa, mwayukatu. Kabiji atweba ba Baptist twaketekela mba wafwainwa kumvwala suti, pakuuba mba uye ku pulupiti, mwayukatu. Nanchi... Kabiji Na—Naiketetu nzoo. Kabiji mukyokya kimye... Yajinga ku Kabeta kabuyeke mambo (kupwila kwabo kukatampe kwa byaalo) bantu bachiluluka kechi bakonsha kwiya na kutanwako ne inge kwa ikajiile ku Kabeta ka bulenge. Kwajinga bachiluluka kokwa, kabiji Amiwa najinga Mwinakabeta kabulenge, teneshi yami kechi yakosakene ne, mwamona, nalangulukile mba Amiwa najingako bulongo kukila muntu umu. Kabiji kyamwekele mba alwa lukeelo, waikela pepi ne amiwa wajinga ke—ke muntu wachiluluka. Nanchi Naikela kabiji nekutala kwi aye. Nalangulukile mba, “Kyawama, aye ke mulongo.”

<sup>166</sup> Kabiji aye waambile mba, “Ng’anyi wayuka kuji William Branham?” Nabandamine mushi ya kipona nobe *bibye*. Nanchi aye waambile mba, wabijikile ja bubiji, amba, “Yense uji pangye” (wabijikile mu maiki wamucheche) “mwayuka kuji William Branham? Mubuulai mba tubena kumukeba kupulatifomu mu kuleta mbila ya lukeelo luno. Aye ke



musapwishi wa ku Baptist kufuma ku Indiana wa kukabeta kabulenge.”

167 Naikoletu nzoo kabiji nafukamina panshi, mwayukatu. Kafwako nangwa umo wanyukile ne, nangwa byonkabyo. Awa songwalume wachiluluka wantajile, waambile mba, “Bushe wayuka koanji nyi?”

168 Amiwa nalangulukile. Na—Nafwainwa kubepa bubela nangwa kubapo kintu kimo. Nanchi Naambile mba, “Ngizhindamaitu papo.”

Aye waambile mba, “Ee, mwane?”

Naambile mba, “Nasaka kukubulapo kintu kimo.” Naambile mba, “Amiwa—Amiwa yami iye.”

Aye waambile mba, “Kyawama, yanga kulutwe akwa.”

169 Kabiji Naambile mba, “Ine, kechi Nakonsha ne. Mwamona,” Naambile mba, “Amiwa namvwala ako katoloshi kamingalalangwa kakala ne Ka-sikipa.” Naambile mba, “Amiwa kechi nakonsha kuya kokwa kulutwe ne.”

170 Aye waambile, “Abo bantu kechi batako muchima kubyowamvwala ne. Yanga kokwa kulutwe.”

Naambile mba, “Ine, ine.” Naambile mba, “Zhindamatu nzoo, kwambapo kintu nangwa kimo ne pano.”

171 Kabiji babwelele ku foni pa minetitu umo, amba, “Ng’anyi wayuka kuji William Branham?”

172 Aye waambile mba, “Awe uji pano! Awe uji pano! Awe uji pano!” Oo, ami! Byo Naimene kasa namvwala konka Ka-sikipa, mwayukatu. Kabiji pano Amiwa . . .

173 Aye waambile mba, “Iya kuno, Mr. Branham, tubena kukukeba obewa mba ulete mbila.” Oo, ami, kumeso abonse bo basapwishi, uhm, bonse bo bantu! Kabiji Naile kasa ng’enda bitende, mwayukatu. Kilungi kyami kyajingatu kyachila, kabiji matwi ami atemenenga. Kabiji Naendeletu pachepache, na katoloshi kamingalalangwa ne Ka-sikipa, musapwishi, Baptist musapwishi kasa aya ku maikolo foni, kechi namonapo umo kunyuma ne, mwamona.

174 Kabiji Naimene popa, Naambile mba, “Kyawama, Ami—Ami—Ami kechi nebiyukapo abye ne.” Nakabakenengatu, nakuzakama, mwayukatu. Kabiji—kabiji Naile mumwe mu Luka 16, kabiji Nalangulukile mba, “Kyawama, pano . . .” Kabiji Na—Nafikile ne pamutwe, “Kabiji aye wasutwile meso anji mukalunga kabafu, kabiji wajijile.” Kabiji Najinga . . . Nanchi Na—Natatwile kusapwila, mwayukatu, kabiji byo Natatwile kusapwila naumvwineko ne bulongo pacheche. Kabiji Naambile mba, “Awa munoshi wajinga mu kalunga kabafu, kabiji wajijile.” Atwa tubyambo tucheche tusatu, nobe byonka byo Nji na busapwishi bwavula byonkabya, “Waketekela Kikyey Nyi,”

kabiji “Amba Ku Jije Jibwe,” mwang’umvwapo kasa sapwila pa bibye. Kabiji Najinga, “Kabiji aye wajijile.” Kabiji Naambile mba, “Kafwamo baana momwa ne, kine kafwamo baana mu kalunga kabafu ne. Nanchi wajijile.” Naambile mba, “Kafwamo maluba momwa ne. Nanchi wajijile. Kafwamo Lesa momwa ne. Nanchi wajijile. Kafwamo Kilishitu momwa ne. Apo pooka Natatwile kujila.” Nanchi Najijile. Kintu kimo kyakwachile. Ami! Oo, ami! Palutwe, kechi Nayuka kyamwekele ne. Byo Nabwelele mu bumuntu bwami, Naimene pangye. Nanchi bantu batatwile kujila ne kubijika, kabiji Ami, twajinga nakimye kyakatazha.

<sup>175</sup> Kimye Amiwa kyo nalupukile pangye kwajinga mulunda umo waishile kwi amiwa kasa amvwala kisochi kikatampe kya ku Texas, ne makense akatampe, waishile konji, waambile mba, “Amiwa ne Eloda *Kananga-ne-kananga*.” Musapwishi, mambuti amakauboyi, byakumvwala bya makau boyi.

Nalangukile mba, “Kyawama, katoloshi kami kamingalalangwa kechi katamishatu ne.”

<sup>176</sup> Naambile mba, “Nakeba mba obewa ukeye ku Texas ukangikeleko na kusangululwa.”

<sup>177</sup> “Uu-uu, lekai ndembe kyokyo, bakulumpe.” Kabiji Nekinembele byobyu.

<sup>178</sup> Awe wiya mulongo umo kasa amvwala umo wamucheche, wamvwajile toloshi umo uji nobe wa golofu, nobe mobateelanga golofu, mwayukatu, wajinga na kakikutu kabanabakazhi. Aye waambile mba, “Amiwa ne Eloda *Kananga-ne-kananga* kufuma ku Miami. Natemwa ku . . .”

<sup>179</sup> “Ami, kape kumvwala kechi kuji na kintu kyabaisha ne.” Nekitajile, kabiji Nalangukile mba, “Kijitu bulongo.”

<sup>180</sup> Nanchi Natolele bibye bintu, kabiji Naile kunzubo. Mukazhi wanukumenye, waambile mba, “Kika kyo ubena kumvwanikila walusekelo, Billy?”

<sup>181</sup> Naambile mba, “Oo, Nakumenye bakila mu kuwama ba kijimwa. Ami, bobakila mukuwama pa bomwakonsha kumona. Aba bantu kechi banji nabuvu na bupopweshi bwabo ne.” Kabiji, oo, Namubuuji letu byonse. Kabiji Naambile mba, “Pano mona kikye, mutemwe, kuji lwito lwavula bingi. Aba bantu!”

Aye waambile mba, “Kechi bo balang’ana bazhila ne, ibo nyi?”

<sup>182</sup> Naambile mba, “Amiwa kechi nayuka ne kana ng’anyi musango wabaalang’ana yebajimo, bino banji na kintu kimo kyo Nakebelenga.” Mwamona? Naambile mba, “Akyaa—akyaa kintu kimo Amiwa kyakine.” Naambile mba, “Namwene mwanamulume mukote, uji na myaka naite, kubwela kubwanyike.” Naambile mba, “Amiwa kechi kyumvwapo akwa kusapwila mu bumi bwami ne. Kika, kechi Nakimonapo Baptist

wasapwila byobya ne.” Naambile mba, “Basapwila poso ne mwela wakumpema wapwa, kabiji babandamika manungo abo panshi, wabwela jibiji, watambula mwela. Mwakonsha kwi bomvwinatu palepa, kasa bakisapwilatu.” Kabiji Naambile mba, “Amiwa—Amiwa kechi nakyuvwapo byabyoba mu bumi bwami ne.” Kabiji Naambile mba, “Bamba ne mujimi yabula kuyukanyikwa, kabiji mukwabo walumbulula byo baamba. Kechi nakyumvwapo byobya mu bumi bwami ne!” Naambile mba, “Ukaya pamo ne amiwa nyi?”

<sup>183</sup> Aye waambile mba, “Mutemwe, kufuma kimye kyo Nakusongwele, Amiwa kalamachila kwi obewa poso lufu luketwabanye.” Aye waambile mba, “Amiwa kaya.” Waambile mba, “Bino, tukabuule bamukisemi.”

<sup>184</sup> Kabiji Naambile mba, “Kyawama, ukabuule bainobe ne Amiwa kabuula bamaama.” Nanchi atweba . . . Naile nakubuula Bamaama.

<sup>185</sup> Bamaama baambile mba, “Kyawama, kine, Billy. Byonse byo akwitako Nkambo amba ube, waya wiibyuba.”

<sup>186</sup> Kabiji nanchi Mrs. Brumbach baipwizhe amba kayeko. Naileko. Abo baambile mba, “Byo bikabye byo ubena kwambapo?”

<sup>187</sup> Kabiji Naambile mba, “Oo, Mrs. Brumbach,” Naambile mba, “anweba bonse kechi mwakibamonapo abo bantu ne.”

Abo baambile mba, “Zhindama! Zhindama!”

Naambile mba, “Ee, maama.” Naambile mba, “Mundekeleko mambo.”

Kabiji baambile mba, “Kechi wayukane mba aja ke jibumba ja baalang’ana bazhila nenyi?”

<sup>188</sup> Naambile mba, “Ine maama, Amiwa kechi nayukile kyokyo ne.” Naambile mba, “Abo—abo kine ke bantu bawama bingi.”

<sup>189</sup> Abo baambile mba, “Mwinetu mulanguluko! Mwaketekela mba ukatwalwa mwanami mubitu bya musango yeo!” Baambile mba, “Byabulamo maana! Abyo kafwako byobiji ne ke bintu bipwilo bikwabo byo bataya.” Baambile mba, “Kine kine! Obewa kechi ukafumyamo mwanami muyeoye musango ne.”

<sup>190</sup> Kabiji Naambile mba, “Bino, mwayuka, Mrs. Brumbach, mukachi mu muchima wami Naumvwa mba aye Nkambo ubena kukeba mba ngyenga naboba bantu.”

<sup>191</sup> Waambile mba, “Obewa bwelatu ku kipwilo kyobe poso bakamwene nzubo yobe, kabiji wafwainwa kuba nobe mwanamulume ujimo na maana.” Waambile mba, “Obewa kechi wakonsha kutwala mwanami mubyobyo ne.”

Naambile mba, “Ee, maama.” Naalulukile kabiji nalupukilemo.

<sup>192</sup> Kabiji Hope watatwile kujila. Walupukile, waambile mba, “Billy, nangwa Bamaama bambe byamusango byepi, Amiwa kekala pamo ne obewa.” Muchima wanji apeshiwe!

Kabiji Nambile mba, “Oo, akyo kijitu bulongo, mutemwe.”

<sup>193</sup> Kabiji Amiwa ne kilekeletu kyapita. Abo kechi bakonsha kuleka mwanabo kuya na boba bantu bamusango yewa ne mambo “Kafwako byo banji ne ke byatutu.” Kabiji nanchi Nekilekeletu kyapita. Kyajinga kilubo kyakila mukutama akyo Naubile mubumi bwami, kimo kyabyakila kutama.

<sup>194</sup> Palutwe pacheche, myaka icheche kupita pakyokyo, baana bamwekele. Kabiji juba jimo twajinga...Kwaishile muyulo, mu 1937. Kwaishile muyulo. Kabiji byetu... Najinga pa kupitang’ana pa kyokya kimye kabiji Naesekelenga kufumya bantu mu muyulo, manzubo alepukilenga. Kabiji ne mukazhi wami wakolelwe, kabiji aye wajinga bingi, wakolelwe bingi na kikola kya kukepelwa mashi mu mubiji. Kabiji bamuvilwijile kungi...Kipatela kyakimye kyonse kyayujilemo bingi bantu kechi kyakonshekele kumutuula momwa ne, nanchi twamutwajile ku—ku kafulumende kobajinga nampuzha kokwa. Kabiji babwelele bangita. Kabiji Amiwa kimye kyonse naikelengatu pa mukola, kabiji mwine kyooba, nanchi Naesekelenga kufumya bantu, kwibapulusha kufuma ku muyulo. Kabiji nanchi Najinnga...umo... .

<sup>195</sup> Bangichile amiwa, baambile mba, “Kuji nzubo kokwa ku Mukwakwa wa Chestnut, amba ijitu pepi na kutwela. Muji bainabo ne jibumba ja baana monkamwa,” baambile mba, “inge walanguluka mba bwato bobbe, mashinyi obe akonsha kufika kwi abo.”

Naambile mba, “Kyawama, Amiwa nsakwesekesha monse mo Nakonsha kubila.”

<sup>196</sup> Kabiji Amiwa, nakupalang’anya oa manyaki. Akyo kipana bukikizhi ku meema kyapomokele, kabiji, oo, ami, aya... nanchi mukuku wa meema wasendelengatu muzhi. Kabiji Naesekelenga nabulume bonse bo Najinga nabo, kabiji pakupezhako kwabuka bushiya kupita mu mikwakwa iji mwaya manzubo kabiji ne kupita mumampuzha. Kabiji Nafikile kwipi nakokwa kwajinga kibumba kyakala, kikanya meema kupita. Kabiji Naumvwine muntu umo watama muteto, kabiji Namwene inabo kasa aimana pa kavalanda. Kabiji kwajinga manyaki akatampe kasa abena kuya byonkabya. Kyawama, Naile peulu *kukwe* nobe kuya byo Nakonsha kuuba, kabiji nafika mu kakola ne kubwela kabiji ne kufika kulubaji lukwabo. Naimikile bwato bwami mukimye kya kuba mba nebukashile ku jishiki, pa kwimena, pa kibelo nangwa pavalanda. Kabiji Nanyemejile mukachi kabiji nakakwata bainabo ne kumubika momwa, kabiji ne babiji nangwa basatu baana. Kabiji Nakasulwile bwato bwami kabiji nekumutwala ku...kunyuma. Kulupukila kunyuma kushi,

kabiji ne kwibatwala kubushiwa bwa kitulu, pepi nobe mailoshi umo na kichika kukilang'anya muzhi, poso byo Namufikizhe kukitulu. Kabiji pano byo nafikilekokwa, wapungijile. Kabiji watatwile. . . wataminenga muteto, “Mwanami! Mwanami!”

<sup>197</sup> Kyawama, Nalangulukile mba walumbulula mba washa kunyuma mwaana munzubu. Oo, ami! Nabwelele jibiji mukimye kyo baesekelenga kumulamawizha. Kabiji, Naishile kutana mba, kyajinga. . . nangwa mba wakebelenga kuyuka kana mwananji uji konka. Kwajinga kamwanyike kacheche pepi nobe myaka isatu, kabiji Nalangulukile mba ubena kutazha mukamwaana kaamwa mabele nangwa kintu kimo.

<sup>198</sup> Kabiji nanchi Nabwelele kumyuma nakafika konka. Kabiji byo Natolele bwato ne kutwela mukachi kabiji kechi nataiemo kamwaana ne, kabiji pakupita pavalanda ne natwela ne munzubu. Kabiji Nanyemene bingi lubilo na kakwata ku—ku kyokya kintu kyakwachile bwato na kutupauka, natwelele mu bwato, kabiji nandoosa ne kulekelako.

<sup>199</sup> Kabiji kyatwajile mukachi ka mwiine mukuku wamwine mukola ponkapo. Kabiji kyajinga pepi nobe leveni-sate bufuku, kabiji yanokelenga yamvwangakana na mabebe. Kabiji Natolele lutambo wakujizhizhako kabiji Nandoosele bwato, bino kechi bwajijile ne, kabiji Naesekele kechi bwajijile ne, kabiji Naesekele ne jikwabo. Kasa mbena kuya kulutwe monka mu mukuku, pota kasa ijitu palutwe yami. Kabiji Naesekeshenga bingi na ngovu, kabiji Nalangulukile mba, “Oo, ami, pano—pano popaji mpelo yami! Aye iyo!” Kabiji Nakosheshenga kweseka nangovu bingi. Kabiji Naambile mba, “Nkambo, nasashijila kundeka mfwe lufu lwa musango yuwe ne,” kabiji Nandoosele kabiji Nandoosele.

<sup>200</sup> Kabiji kyaishile mwi amiwa mba, “Panonga aja jibumba ja kyabekyabe jo ubula kukeba kuyako?” Mwamona? Uu-uu.

<sup>201</sup> Nabikile jibiji kuboko kwami ku bwato, kabiji Naambile mba, “Lesu, ngubilaikotu lusa. Kechi mundeke shee bakazhi bami ne mwaana muyuwe musango ne, kabiji abo kokwa kasa banji bakolwa! Nasashijila!” Kabiji Natwajijiletu nakundoosa byonkabya, kabiji kechi yajijile ne. Kabiji Natatwile kumvwa mpota kokwa kulutwe, mambo Na. . . Ke maminetu acheche, kabiji, oo, ami, akya nishi ikyo. Kabiji Naambile mba, “Nkambo, inge Mwandekelako ambo, Ne mulaya Anweba namba Nkoba kiji kyonse.” Nafukamine monkamwa mu bwato, kabiji meema amabebe nkeafikile ne mukilungi. Naambile mba, “Amiwa nkooba kiji kyonse Anweba kyo mukakebela amba ngube.” Kabiji Nandoosele ne jikwabo, kabiji bwatatwile. Kabiji Nabikile mafuta onse o Nakonsha kupompa, kabiji ponkapo nafikile ku kitulu.

<sup>202</sup> Kabiji Nabwelele na kutana tulaki, tulaki wakuputang'ana nanji. Kabiji Nalangulukile mba. . . Kujipo bamo baamba,

“Mba, kafulumende wasendwa na meema.” Bakazhi bami ne mwaana kasa baji monka mwa, baana bonse babiji.

203 Kabiji Natatwile kuya ku kafulumende nangovu monka mo Nakonsha kwikyubila, kabiji meema aimene pepi nobe mafiiti fifitiini kuzhika konse konse. Kabiji kwajinga meja kokwa, kabiji Naambile mba, “Meja, kika kyamweka ku kipatala?”

Waambile mba, “Pano, kusakamana ne. Ujipo na umo mukachi nyi?”

Naambile mba, “Ee, aye—aye wakolwa mukazhi ne baana babiji.”

204 Aye waambile mba, “Bonse bafumamo.” Waambile mba, “Banji mu shitima isenda bipe kabiji batala ku Charlestown.”

205 Nanyemene, natwelele mu bwato ne... nangwa kutwela mu motoka wami, kabiji bwato bwami nakasa kunyuma, kabiji nanyemejile konkakwa ku... Kabiji pano bikulungwa byabaijileko pepi nobe tuu na afu nangwa ma mailoshi asatu kubaya. Kabiji bufuku bonse Naesekele ku... Bamo mwiabo baambile mba, “Motoka, shitima wabipe, ngyangi beisendele na mukwe wameema ponka pa kyamba kipana bukwasho.”

206 Kyawama, netaine amiwa mwine nachibikilwa pa kitulu kyakicheche, naikele popa moba asatu. Najinga na kimye kyabaya bingi nakulanguluka kana Abya byajinga byatutu nangwa ine. Namanyikilwengatu mumilanguluko, “Kwepi kuji bakazhi bami?”

207 Pakupezhako kimye kyo Namutaine, mu moba acheche byo Nafumineko ne kwabuka kubushiya, wajinga kokwa ku Columbus, Indiana, mu Kishimikwa kya ba Baptist momobaalwile ke—ke kipatela, mpuzha ya balwazhi pa tumyanya twa kafulumende. Kabiji Namunyemejile lubilo mo Nakonsha kubila, kweseka kukeba kwepi koajinga, ubena kujilatuta, “Hope! Hope! Hope!” Kabiji Natajile, kabiji walajile pa kamwanya, kabiji ne TB watwelamo.

Wasutwile kuboko kwanji kwabikupatu, kabiji waambile mba, “Billy.”

Kabiji Namunyemejile, kabiji Naambile mba, “Hope, mutemwe.”

Waambile mba, “Namwekatu bingibingi, kechi Byonji nyi?”

Naambile mba, “Ine, mutemwe, wamwekatu bulongo.”

208 Pepi nobe bang’ondo sikisi twaingijile na byonse biji mwiatweba, mukweseka kumpulusha bumi bwanji, bino watwajijiletu na kubwela pathi.

209 Juba jimo Najinga pa kupitang’ana kabiji Najinga na waileshi wami wajinga waambuka, kabiji Nalangulukile nobe Nebomvwa kasa baamba mba, tumai pa waileshi, waambile mba, “Mambo William Branham, ubena kukebewa

ku kipatela bukiji bukiji, mukazhi ubena kufwa.” Nanyemene kubwela ku kipatela bukiji bukiji mo Nakonsheshe kubila, naambwile jilaichi jichila ne kyongo kyakupana lujimuno, kabiji natatwileko. Kabiji pano Na—Nafikile pa kipatela kabiji Naimene, natwelelemo. Kwiya kupita mu—mu kipatela, Namwene mutemwe wami mucheche ao ye twapwishishe pamo, twakailanga pamo nobe basongwalume, Sam Adair.

<sup>210</sup> Dokotala Sam Adair, aye iye wajinga mu kimonwa kyaishile kechi papita kimye kyabaya ne kabiji ne kumubuula namambo a kiliniki. Kabiji aye waambile mba, inge muntu uji yense wazhinauka kimonwa, mwitaitu waololapo, anweba mubena kukeba kuyuka kana kiji bulongo nangwa ine.

<sup>211</sup> Kabiji nanchi pano waishiletu byonka bya, kabiji wajinga na kisochi kyanji mukuboko kwanji. Aye wantajile kabiji watatwiletu kujila. Kabiji Namunyemejile, nataile maboko ami ku muzhokolosha. Aye wambikile maboko anji nkuzhokolosha ami, waambile mba, “Billy, ubena kuya.” Aye waambile mba, “Ndekeleko mambo. Nauba byonse byo Nakonsha kuba, Naikala na basendwe ne bintu byonse.”

Naambile mba, “Sam, kine kechi ubena kuya ne!”

Waambile mba, “Ee, ubena kuya.” Kabiji aye waambile mba, “Kechi utwelelemo mukachi ne, Bill.”

Kabiji Naambile mba, “Nafwainwa kutwelamo, Sam.”

Kabiji aye waambile mba, “Kwikyuuba ne. Kuuba ne, nasashijilapo kuuba ne.”

Naambile mba, “Lekai ami twele mukachi.”

Waambile mba, “Amiwa nsakuya nobe.”

<sup>212</sup> Naambile mba, “Ine, obewa ikalatu konka kuno. Amiwa nakeba kwikala nanji mu maawala apelako.”

Waambile mba, “Aye kechi ubena kulaba ne.”

<sup>213</sup> Naendele kuya mu luumu. Kabiji manase waikele byobyaya, kabiji wajijilenga mambo aye ne Hope bafundangatu sukuulu wabo pamo. Kabiji nanchi Namwene, kabiji watatwile kujila, wabikile kuboko kwanji peulu. Kabiji watatwile kwenda kuyako.

<sup>214</sup> Kabiji Natajile konka, ne kumusukanya. Byobyayo ajinga, waile panshi kufuma pepi nobe aduleendi ne tweti mapaundi, kwiya kape nobe sikisite. Kabiji Amiwa—Amiwa namusukainye. Kabiji inge Nakonsha kwikala kufika pa myaka aduleendi, Amiwa kechi kalubako kyamwekele ne. Aye waalukile, kabiji ne oa meso abaya awama atajile peulu kwi amiwa. Wamwemwesele. Waambile mba, “Kika kyowaji kumbwezhezha, Billy?”

Naambile mba, “Mutemwe, Amiwa njitu namilanguluko.”

<sup>215</sup> Nafwayijilwe kwingila. Twajinga nakongole kufika ku ma aduleendi a madola a kulipula kwi dokotala, kabiji kechi

kwajinga mwakulipilila ne. Kabiji Nafwayijilwetu kwingila. Kabiji Namumonanga jibiji angwa jisatu pa juba, kabiji ne kila bufuku, kabiji pano byo afikile ne muyewa musango.

Naambile mba, “Walumbulula ka, ‘Kukwita’ mba ‘ubwele?’”

<sup>216</sup> Waambile mba, “Bill, obewa wasapwilapo pa Kikye, waambapo pa Kikye, bino kechi uji na buyuke bwa Byokiji ne.”

Naambile mba, “Ubena kwamba pang’anyi kitu?”

<sup>217</sup> Aye waambile mba, “Mwiulu.” Waambile mba, “Tala,” waambile mba, “Amiwa baji kushijikinyanga kutwala ku Nzubo ku bantu bamo, banabalume nangwa banabakazhi nangwa kintu kimo. Abo baji kumvwala bitoka.” Kabiji waambile mba, “Najinga wakasuluka ne mutende.” Waambile mba, “Babaya bawama bang’onyi babena kutumbuka kufuma ku kinchi kimo kuya ku kikwabo.” Waambile mba, “Kechi ulanguluke mba Amiwa nalubakanako milanguluko ne.” Waambile mba, “Billy, Mbena kukubuula po twalubakenye.” Waambile mba, “Ikala papo.” Amiwa kechi byo naubile ne; Nafukamine panshi, natolele kuboko kwanji. Waambile mba, “Wayuka paji kilubo kyetu nyi?”

Kabiji Naambile mba, “Ee, mutemwe wakumuchima, Nayuka.”

<sup>218</sup> Waambile mba, “Atweba inge twatelekele kuba Maama ne. Aba bantu bajingatu bulongo.”

Kabiji Naambile mba, “Amiwa ne kiyuka.”

<sup>219</sup> Waambile mba, “Undaye kikye, amba ukaya kuboba bantu,” waambile mba, “mambo bajitu bulongo.” Kabiji waambile mba, “Ukankomesheshe baana bami muyekawa musango.” Kabiji Ami. . . Waambile mba, “Nasaka kukubuula kintu kimo.” Aye waambile mba, “Amiwa mbena kufwa, bino” waambile mba “kiji. . . Amiwa kechi—Amiwa kechi jipo namoyo wakuya ne.” Waambile mba, “Ke—ke kintu kyawama.” Waambile mba, “Kintutu kimo, Nashikwa kukusha obewa, Bill. Kabiji Nayuka mba uji na baabo baana babiji bakukomesha.” Waambile mba, “Undaye kuuba mba—mba kechi ukekale bunke ne kabiji ne kuleka baana bami bakendaukengatu kufuma kukwe ne kuya kokwa ne.” Akya kyajinga ke kintu kyamaana kuyewa semi-wa myaka-tweti-wanu.

Kabiji Naambile mba, “Amiwa kuuba nalaya kyokyo ne, Hope.”

<sup>220</sup> Aye waambile mba, “Nakusashijila undaye.” Waambile mba, “Kintu kimo kyo Mbena kukeba kukubuula.” Waambile mba, “Wavuluka abwa buta bwa laifo nyi?” Amiwa nalubakana milanguluko pa bya mata. Kabiji aye waambile mba, “Obewa wakebelenga kupota bobwa buta bwa laifo pa joja juba kabiji kechi wajinga na mali akumaina a kupanako ne.”

Naambile mba, “Ee.”



221 Waambile mba, “Amiwa nakusunganga mali ami, ba ngwe, pakuuba mba tukumanishe yakupanako kuyewa laifo obe.” Waambile mba, “Pano, inge abye byonse byapwa kabiji wabwela ku nzubo, ukamone pachiiyiwa jibiji. . . nangwa mwanya wa kuchiipa, panshi ya kyokya kipepala peulu, kabiji ukatana mali ponkapa.” Waambile mba, “Undaye amba ukapota yewa laifo.”

222 Anweba kechi mwayuka byo Naumvwine ne byo Namwene awa dola sebetefaiwi maseti (a muwayawaya) aikala popa. Amiwa napotele laifo.

223 Kabiji aye waambile mba, “Obewa wavuluka akya kimye byo wailenga na nkupotela masokoshi, kabiji twailenga ku Fort Wayne?”

Naambile mba, “Ee.”

224 Amiwa nafuminetu na kuloba, kabiji waambile mba. . . Twafwayijilwe kuya ku Fort Wayne, Nafwayijilwe kusapwila abwa bufuku. Kabiji waambile mba, “Wayuka, Nakubuujile, ‘Kuji bintu bibiji byapusana.’” Kimo kyatelwa mba “shifoni.” Kabiji kikwabo kyo kika, kilipulini? Abyo ibyo nyi? Kilipulini ne shifoni. Kyawama, monse mo byaikela, shifoni wakila kuwama. Abyo ibyo nyi? Kabiji aye waambile mba, “Pano, upotele shifoni, wapwijijika.” Obewa wayuka kyokya kintu kiji na kakitu kacheche kunyuma ya sokoshi, peulu nyi? Kabiji Amiwa kechi nayukilepo kintu kimo pa byakuvwala bya banabakazhi ne, nanchi Ami. . .

225 Kabiji Nailenga mukwakwa nakwamba mba, “Shifoni, shifoni, shifoni, shifoni,” pakuuba mba twajijiletu nakulangulukapo, “shifoni, shifoni, shifoni.”

Muntu umo waambile mba, “Byepi, Billy!”

226 Naambile mba, “Oo, byepi, byepi.” “Shifoni, shifoni, shifoni, shifoni, shifoni.”

227 Kabiji Nafikile pa koonaa kabiji Nakumenye Mr. Spon. Aye waambile mba, “Byepi, Billy, wayuka mba byela byakwata kibumba pano kulubaji lwa kya kukukokolokelamo kibena kukozhang’ana?”

Naambile mba, “Kine pakatampetu, abyo ibyo nyi?”

“Ee.”

Nalangulukile pano, byo Namushiile, “Akya kintu kyajinga kika?” Amiwa ne kilubilemo.

228 Nanchi Thelma Fold, songwakazhi ye Nayukile, waingilanga pa shitolo wa ten-cent. Kabiji Nayukile mba bapoteshamo masokoshi kokwa, nanchi Naile konka. Naambile mba, “Byepi, Thelma.”

Kabiji aye waambile mba, “Byepi, Billy. Uji byepi? Nga Hope uji byepi?”

229 Kabiji Naambile mba, “Kyawama.” Naambile mba, “Thelma, Amiwa mbeni kukeba masokoshi akwa Hope.”

Aye waambile mba, “Hope kechi ukeba masokoshi ne.”

Naambile mba, “Ee, maama, kine ubena kukeba.”

Waambile mba, “Mwatazha mukuuba mba masokoshi alepa.”

230 “Oo, kine,” Naambile mba, “abyo byo kiji.” Nalangulukile mba, “Uu-oo, Namwesheshe bulubi bwami.”

Kabiji aye waambile mba, “Amusango ka o abena kukeba?”

Nalangulukile mba, “Uu-oo!” Naambile mba, “Muji na amusango ka?”

Aye waambile mba, “Kyawama, tuji na kilipulini.”

231 Amiwa kechi nayukile lupusano lujipo ne. Kilipulini, shifoni, byonse byumvwanjika pamo. Naambile mba, “Ao o Mbeni kukeba.” Aye waambile mba... Naambile mba, “Nengezhezhe abiji, apwijijika.” Kabiji aye... Nalubakanya. Kyokika? Musango wapwijijika. “Musango wapwijijika.” Kabiji nanchi Naambile mba, “Nengezhezhe abiji.”

232 Kabiji byo aile mba apane kwi amiwa, ajingatu pepi nobe maseti sate, tweti maseti nangwa maseti sate, ke afutu wamutengo. Kyawama, Naambile mba, “Pai mapeya abiji.” Mwamona?

233 Kabiji Nabwelele kunzubo, kabiji Naambile mba, “Mwayuka, mutemwe, na kupitang’ana mashitolo a banabakazhi mobakonsha kumbwezhezheko.” Mwayukatu byo mwatemwa byawama. Kabiji Naambile mba, “Bino kuno, tala kuno, Napota mapeya abiji a mutengo ye mupota imo. Mwamona?” Naambile mba, “Oo, ako—ako ke kukosha kwami bunke.” Monai, Naambile mba—Naambile mba, “Mwayuka, Thelma ye waji kupotesha bibye.” Naambile mba, “Aye wajikupa mba ne atambule pa mutengo wa afu.”

Aye waambile mba, “Mwakupota shifoni?”

234 Naambile mba, “Ee, maama.” Byonse byaji kumvwanjika pamo kwi ami, Amiwa kechi nayukilepo amba kujipo ne lupusano ne.

235 Kabiji aye wambujile, waambile mba, “Billy.” Amiwa nalangulukile mwapusanako byo twafikile ku Fort Wayne, wakapotele masokoshi akwabo alepa. Aye waambile mba, “Ne apana kuba inobe,” waambile mba, “abanabakazhi bakote.” Naambile mba, “Undekeleko mambo Amiwa pakuuba kyokyo.”

Kabiji Naambile mba, “Oo, akyo kijitu bulongo, mutemwe.”

236 Kabiji aye waambile mba, “Pano, kechi—kechi ukekale bunke ne.” Kabiji aye waambile mba... Aye kechi wayukile mba kisa kumweka mu mawala acheche kufuma popa. Kabiji

Nakwachile maboko anji abutemwe kimye ba Malaika bakwa Lesa kyo bamusendelenga.

<sup>237</sup> Naile kunzubo. Amiwa kechi nayukile kyakuba ne. Nalajile popa bufuku kabiji Naumvwine. . . Naketekela kyajinga mpuku mucheche, wajinga mukibokoshi kyakala amo mwajinga bipela bimobimo. Kabiji Nashiikile kibelo na kulu kwami, kabiji akwa kwakobamine ki mukukumba kyanji kunyuma, (kabiji kasa alala monka mu mochali). Kabiji mu kakimyetu kacheche muntu umo wangichile, waambile mba, “Billy!” Kabiji wajinga Mulongo Frank Broy. Aye waambile mba, “Mwanobe ubena kufwa.”

Naambile mba, “Mwanami?”

<sup>238</sup> Waambile mba, “Ee, Sharon Rose.” Waambile mba, “Doko uji konka pa kino kimye, kabiji waambile mba, ‘Aye uji na kikola kya manijaitisi, wikifumishe ku bainanji.’” Kabiji waambile, “Ubena kufwa.”

<sup>239</sup> Natwelele mu motoka, naile konka. Kabiji na mutaine, kakintu kacheche kawama. Kabiji bamunyemeshe ku kipatela.

<sup>240</sup> Naile na kumumona. Sam waishile ne kwamba mba, “Billy, kechi uye muyewa luumu ne, wafwainwa kulangulukapo pe Billy Paul.” Waambile mba, “Ubena kufwa.”

Naambile mba, “Doko, Na—Nafwainwa kumona mwanami.”

<sup>241</sup> Aye waambile mba, “Ine, kechi wakonsha kutwelamo ne.” Waambile mba, “Uji na manijaitisi, Billy, kabiji usa kusenda kutwajila Billy Paul.”

<sup>242</sup> Kabiji Napembejiletu walupukamo. Amiwa kechi na konsheshe kumumona kasa abena kufwa ne, kabiji bainaji kasa balala momwa mwakusungila bafwa ne. Ne mubuula, jishinda ja muntu wazhilulula jakosa. Kabiji Na—Naile, natwela kukibelo, kabiji Sam byo alupukile ne manase walupuka, Naile monka mo ajinga. Ke kakipatela kakacheche. Wajinga mumpuzha yabuke, kabiji baluzhi bajinga mu tumeso twanji twatucheche. Kabiji bajinga na kacheche. . . kyo tutela mba “kyandaluba,” nangwa kacheche kamesomeso kakuzhika pa meso anji. Kabiji aye wajinga. . . na musavu, mukupa wanji wamucheche wabaya waendaukilenga peulu ne panshi byobya, kabiji ne tumaboko twanji twatucheche, na kusavuka. Kabiji Natajile pe aye, kabiji wajinga wakoma kya kuuba mba wakonsha kutalwatu bulongo, pepi nobe bang’ondo eiti.

<sup>243</sup> Kabiji bainanji bamwikazhanga byobya kasa amvwala kya makoka—asatu, mwayukatu, monka mulubaza, kimye Amiwa nge naiya. Kabiji Nachinika pa unda, kabiji waubanga mba, “goo-goo, goo-goo,” kasa abena kwiya kwi amiwa, mwayukatu.

<sup>244</sup> Kabiji popa palala mutemwe wami, kasa abena kufwa. Amiwa namutajile, kabiji Naambile mba, “Sharry, wayuka Bataata? Wayuka Bataata, Sharry?” Kabiji byo antajile. . . Aye

wamanamine bingi kyakuuba mba ne jiso jimo jajicheche ja kifufya jashikika. Kyajinga nobe kyafumyamo muchima mwi amiwa.

245 Amiwa nafukamine panshi, Naambile mba, “Nkambo, kika kyo Nauba? Bushe kechi Nasapwila Mambo awama monse mu makoona a mikwakwa? Nauba kintu kyonse kyo Nayuka kuuba. Kechi mwikibike ku mambo ami ne. Amiwa kechi ne batelelepo mba ‘bakyabekyabe’ ne. Aye ye wibatelele mba aba bantu ‘bakyabekyabe.’” Naambile mba, “Amiwa ngubilwe bibusa pakuuba mba kyamweka. Ndekelaiko mambo. Kechi—kechi musende mwanami ne.” Kabiji kimye kyo Nalombelenga, kyamwekele nobe kifita. . . nobe kyatandubulwa nangwa kisapi kyaishile panshi. Nayukile mba Aye wankaina.

246 Pano, akya kyajinga kimye kyakosa bingi kabiji kyakatazha bingi kya mu bumi bwami. Kimye Amiwa kyo naimene kabiji natala pe aye, kabiji Nalangulukile mba. . . Satana wabikile mu milanguluko yami mba, “Kyawama, kasa ubena kusapwila kyakosa byobya, kabiji ne jishinda jo waikelamo, kabiji pano pa kwiya ku mwanobe, Aye wakukaina?”

247 Kabiji Naambile mba, “Abyo ibyo. Inge wabula kupulusha mwanami, nanchi kechi Nakonsha ne. . .” Na lekele. Amiwa—Amiwa kechi nayukile ne kyakuuba ne. Kabiji pano Naambile bibye, Naambile mba, “Nkambo, Anweba mwamupaine kwi amiwa kabiji Anweba mwamusenda, jitotwe Jizhina ja Nkambo! Inge Anweba mwasenda ne amiwa, Amiwa katwajijilatu na kwi mutemwa Anweba.”

248 Kabiji Nabikile koboko kwami pe aye, Naambile mba, “Upeshiwe, mutemwe wawama. Batata bakukebanga mba ukome, na muchima wami yense Nakebelenga mba ukome, kabiji kukukomesha amba ukatemwe Nkambo. Pakuuba ba Malaika babena kunanga obewa, mutemwe wawama. Bataata bakasenda mubiji obe wamuचेche ne kumulajika mu maboko aba Maama. Amiwa kakuzhika pamo ne aye. Juba jimo Bataata bakakusambakana, obewa ukapembeleletu kokwa ne ba Maama.”

249 Kimye bainanji kyo bafwilenga, waambile mba, mu byambo byanji byakupezhako, waambile mba, “Bill, utwajijile mu mwingilo.”

250 Naambile mba, “Amiwa koba. . .” Aye waambile mba. . . Naambile mba, “Inge Amiwa nkekala mumwingilo kimye Aye kyo akeya, Amiwa katola baana ne kusambakana. Inge Amiwa ine, Amiwa kazhikwa kulubaji lobe. Kabiji uye kulubaji lwa kilujo lwa kibelo kikatampe, kabiji byo ukamona bonse batwela mukachi, ukemane popa ne kutatula kubijika, ‘Bill! Bill! Bill!’ na kubijika kukatampe. Amiwa kakukumanya kokwa.” Namufyopele mba waenda-bulongo. Amiwa nji pa kondo jaleelo.

Akyo ke pepi nobe myaka tweti. Amiwa nalayang'ene nanji mukazhami, Amiwa kamusambakana.

<sup>251</sup> Kabiji Natolele kamwana kakacheche, byo afwile, kabiji na mubikile mu maboko aba inanzi, kabiji twamutwajile ku bilende. Kabiji Naimene popa na kumvwa Mulongo Smith, musapwishi waku Methodist ye wasapwijile pa kijilo, “Buto ku buto, kabiji lukungu ku lukungu.” (Kabiji Nalangulukile mba, “Muchima pa muchima.”) Byobyo ayile.

<sup>252</sup> Kechi papichile kimye kyabaya ne, lukeelo lumo Namutwajile konka Billy wamuheche. Aye wajinga mulongo muheche. Aye wajinga . . .

<sup>253</sup> Ao oene mambo aye kyo alamachila kwi amiwa kabiji ne Amiwa kwi aye, Najinga byonse Taata ne Maama (byonse) kwi aye. Natolanga botolo wanji wamuheche. Atweba kechi twakonsheshe kwikala na mujilo bufuku ne pakuuba mba mukaka wanji ekale wakaba, kabiji Amiwa na mulajikanga panyuma yami nobe bibye ne kumulama kasa atwakyuya nakyuya kya mubiji wami.

<sup>254</sup> Atweeba twakwatakana pamo nobe balunda, kabiji juba jimo inge Naleka mwingilo Amiwa nkakeba kumupa Kyambo, kabiji ne kwamba mba, “Yanga kulutwe, Billy. Obewa ukekale Nakyo.” Bantu bamo bakumya kika Amiwa kyo tainwa nanji kimye kyonse. Amiwa kechi nakonsha kumuleka ne. Aye wasongola ne kusongola, bino Amiwa kivuluka byambo byo ambujile, “Ukekale nanji.” Kabiji twakwatakana pamo nobe balunda.

<sup>255</sup> Navuluka kwenda nanji nakuzhokoloka mu tauni, botolo kasa anji mukwapa, aye watatula kujila. Bufuku bumo aye wajinga . . . twaendelenga kunyuma ya lubaza ako . . . (Inge ubena kwinegezha kumutambula, aye kekupemashikatu, kabiji Na . . . kasa ajitu songwakazhi, mwayukatu.) Kabiji Nakonsheshenga kwenda kubwela kunyuma ne kulutwe kufuma ku kinchi kyakala kya maoka kyajinga kunyuma yalubaza. Kabiji aye wajijilenga nakukeba Bainanji, kabiji Amiwa kechi najinga na Maama unji yense kwakumutwala ne. Kabiji Namusendanga, Naambanga mba, “Oo, mutemwe.” Naambile namba . . .

<sup>256</sup> Aye waambile mba, “Taata, bamaama bajipi? Bushe mwibabikile mu mushiji?”

Naambile mba, “Ine, mutemwe. Aye ujitu bulongo, uji Mwiulu.”

<sup>257</sup> Kabiji aye waambile kintu kimo, akyo kyakebele kungipaya, kimye kimo mute. Aye wajijilenga, kyajinga kimye kyapwa mabaanga, kabiji Namusendele munyuma yami *byobya*, kasa namusenda pa bipuzhi byami kabiji kasa mbena kumutekenesha nobe *bibye*. Kabiji waambile mba, “Taata, napopwela yainga mukaleta Bamaama mwi balete kuno.”

Kabiji Naambile mba, “Mutemwe, Amiwa kuuba naleta Maama ne. Yesu. . .”

Waambile mba, “Kyawama, bulai Yesu andetele bamaama bami. Amiwa mbena kwibakeba.”

<sup>258</sup> Kabiji Naambile mba, “Kyawama, mutemwe, Ami. . . amiwa ne obewa tukaya na kumumona kimye kimo.”

Kabiji walekele, waambile mba, “Taata!”

Kabiji Naambile mba, “Ee?”

Waambile mba, “Namona Bamaama apa peulu pa jikumbu.”

<sup>259</sup> Ami, kyajingatu nobe kyangipaya! Nalangulukile mba, “Ami! ‘Namona Bamaama peulu popa pa jikumbi.’” Najingatu pepi nakupungila. Amiwa na mukwachile mulongo mucheche mukyaji kyami nobe *byobya*, kabiji nakunyikiletu mutwe wami panshi, natweleletu mukachi.

<sup>260</sup> Moba apichilepo. Amiwa kechi nekilubileko ne. Naesekele kwingila. Kechi nakonsheshe kubwela ku nzubo ne, kechi yajinga ke nzubo ne. Kabiji Nakebelenga kwikala. Atwebwa kechi twajinga na kintu kimo ne kanatu aya mipando yafwafwafwa, bino byajinga bintu bimo abyo aye ne Amiwa byo twajinga nabyo nalusekelo. Yajinga nzubo.

<sup>261</sup> Kabiji Navuluka juba jimo Naesekelenga kwingila mu mwingilo wa kafulumende. Naile na kulungisha sekondale wakala, ao wapepejilenga panshi, kyajingatu lukeelo kelo. Kabiji Nakajijile kuyuwe musalabo. (Kabiji Amiwa kechi nakajijile nayewa mwaama peulu ne. Amiwa kechi namwene mukazhami byo ailenga ne, kana awa mwaana byo ailenga, kasa akijitu mucheche.) Kabiji Najingako, kabiji Naimbilenga, “Pa mutumba kwalepa, waimene popa pa Musalabo wakosakana.” kabiji tambo itanshi yaile kufika ku tulasifoma abiji yalupuka kuya (mwayukatu) mukyalondelapo. Kabiji Nakobamine kwiulu konkakwa. Kabiji Natajile, ne juba jasaminenga kunyuma yami. Kabiji kokwa, maboko ami atanyikilwe ne kiyukilo kya Musalabo ku—kulubaji lwa katumbatumba. Nalangulukile mba, “Ee, kyajinga bubi bwami bwa Mubikile popa.”

<sup>262</sup> Naambile mba, “Sharon, mutemwe, Bataata babena kukukeba bingi, mutemwe. Byo Nakonsha kukukwata jibiji mu maboko ami, obewa mutemwe mucheche.” Nalubakene mu milanguluko yami. Papichile ke milungu. Navujile ma kalapusi ami. Kwajinga tweti-fili aduleendi bulume bwa malaaiti apichilenga kwipi kulubaji lwami. Amiwa navujileko makalapusi ami. Naambile mba, “Lesu, Nashikwa kuba bibye. Nji namoyo.” “Bino, Sharry, Bataata bakakumona kabiji ne Bamaama mu maminetitu acheche.” Natatwile kuvula makalapusi ami, pakuuba mba mbike kuboko kwami kokwa ku tweti-fili aduleendi. Kyakonsha kulala. . . Kika, kechi wakonsha kwikala na mashi wafwainwa kushala mwi obewa ne.

Kabiji nanchi Na—Na—Natatwile kuvula awa kalapushi, kabiji ponkapotu kintu kimo kyamwekele. Byo Nabwelele mubututulu, Naikele panshi maboko ami kasa asutulwa peulu nobe *bibye*, mu kilungi kyami, kasa mbena kujila. Kyajinga lusa lwakwa Lesa, inge ne Amiwa kechi nji mpwijilo ya lubuko ne kuno, Njina luketekelo na kyokyo. Kyajinga Aye wakikizhenga bupe Bwaji, kechi amiwa ne.

<sup>263</sup> Natatwile kuya kunzubo. Nalekele, nafile byela byami. Kabiji nabwelele kunyuma, Naambile mba, “Amiwa mbena kuya kunzubo.”

<sup>264</sup> Natatwile kuzhokoloka ku nzubo, kabiji Natolele makalata mu nzubo, kwajinga kwatalala, kabiji Natwelele mukachi. Twajinga na luumu umo, Nalajile pa kamwanya kachehe popa, kabiji mabebe atatwile kupangwa, kabiji ne yewa kitofu wakala. Natolele makalata kabiji Natajile mu makalata, kabiji kintu kitanshi kyajingapo ke kusunga kwanji kwa Kimishimishi, maseti eiti, “Miss Sharon Rose Branham.” Byo kyajinga, ne jikwabo kyabwelapo.

<sup>265</sup> Najinga mukulumpe waba ngemu. Nafikile momwa ne kutola buta bwami, pisito, kufuma mu kikwama. Naambile mba, “Nkambo, Amiwa—Amiwa kechi bibye kulutwe ne, Amiwa—Amiwa mbena kufwa. Amiwa—Amiwa namanyikwa bingi.” Nampazhile buta, ne kwibutazha ku mutwe wami, nafukama popa pa mwanya mu luumu mwafita. Naambile mba, “Taata Wetu Wa Mwiulu, jizhile Jizhina Jenu. Bufumu Bwenu bufike, Kyaswa muchima wenu kyubiwe,” kabiji byo Naesekele, kabiji Nakobelemo bingi nangovu mo Nakonsha kubila, Naambile mba, “pano panshi byonka byo kiji Mwiulu. Tupai kajo ketu kalelo.” Kabiji bwakakelwe kulozeka!

<sup>266</sup> Kabiji Nalangulukile mba, “Anweba Lesa, Anweba mubena kuchibaulatu mu mapimvwa? Kika kyo Nauba? Anweba kechi mwakonsha kundeka mba fwe ne.” Kabiji Nataile buta panshi, kabiji bwiine bwalozekele ne kuloza kupita mu luumu. Naambile mba, “Lesu, kika kyo Nakonsha kubujila kufwa na fumamo mukikye? Amiwa kechi kutwajijila kuya kulutwe ne. Anweba mwafwainwa kubapo kintu kimo kwi amiwa.” Kabiji Naponene jibiji ne kutatula kujila pa kacheche kami, pa mwanya watetakana wakala wandochi.

<sup>267</sup> Kabiji Amiwa kyajinga nobe nalajile. Amiwa kechi Nayuka ne kana nalajile nangwa kyamwekele kika.

<sup>268</sup> Amiwa kimye kyonse nakebangatu kuya ku Muzhika. Nakebanga kisochi kyayewa musango kimye kyonse. Bataata bajinga babula mali mu moba abo abwanyike, kabiji kimye kyonse Nakebanga kimo kya byobya bisochi. Kabiji Mulongo Demos Shakarian wapotejilepo kimo keesha, kitanshitu kyo Naikala nakyo (kyo nakikalapo akyo) kiji byobya, kyapasha bisochi bya kumuzhika.

269 Kabiji Nalangulukile mba Mbena kuya na kupita mwaaya majimi, nakwimba yewa lwimbo, “Kuji jiwilo ja ku kikochikala ja mokoka, kiyukilo kya mwakusungila banyama, ‘Byalupoto.’” Kabiji byo Nailenga, Namwene kikochikala kyakala kyamvwetwa, nobe mashinyi asenda bipe mu majimi, kabiji jiwilo ja mokoka. Mambo, akyo kyaimenako kisemi kyami kyaabanwapo. Kabiji byo Nafwenyenye kwipi, Natajile, kabiji popa paimene wa—walamba bingi, songwakazhi mwanyike, uji pepi nobe myaka tweti, suki itoka ibena kupepela kabiji ne meso akifufya, wamvwala bitoka. Amiwa natajile pe aye, Naambile mba, “Uji byepi?” Natwajijiletu nakuya kulutwe.

Aye waambile mba, “Byepi, Taata.”

270 Kabiji Naalukile natala panyuma, Naambile mba, “Taata?” “Kika,” Naambile mba, “byepi, Miss, obewa wafwainwa... nakonsha Amiwa kwikala shobe kasa uji na myaka pamo nobe Amiwa?”

271 Aye waambile mba, “Taata, kechi mwayukatu koomuji ne.”

Kabiji Naambile mba, “Watazha muka?”

272 Aye waambile mba, “Muno ke Mwiulu.” Waambile mba, “Patanda Najinga Sharon wenu wamuheche.”

“Kika,” Naambile mba, “mutemwe, obewa wajingatu ka mwaana kakacheche.”

273 Waambile mba, “Taata, baana balukeke kechi balukeke kuno ne, ke babula kufwa. Abo kechi bakota ne nangwa kukoma ne.”

274 Kabiji Naambile mba, “Kyawama, Sharon, mutemwe, obewa—obewa walamba, mwanamukazhi wakyanyike.”

Aye waambile mba, “Bamaama babena kwi mupembelela.”

Kabiji Naambile mba, “Kwepi?”

Aye waambile mba, “Peulu pa muzhi wakatataka.”

275 Kabiji Naambile mba, “Muzhi wakatataka?” Benabranham kechi baji na pakwikala ne, kechi baji na mizhi ne, abo bobatu... Kabiji Naambile mba, “Kyawama, Amiwa kechi najinga na muzhi ne, mutemwe.”

276 Ae waambile mba, “Pakuuba anweba muji na umo kuno, Taata.” Amiwa kechi natazha mu kuuba mba kwikala ka mwaana ka lukeke ne, bino pa bututulutu kwi amiwa. [Mulongo Branham ke kujila—Waku.] Byo Natatula kulanguluka pa kikye, kibwelatu kyonse jibiji. Waambile mba, “Muji naumo kuno, Taata.” Nayuka mba Njina umo kokwa, juba jimo Amiwa kaya konka. Waambile mba, “Kwepi kuji Billy Paul, mulongo wami?”

277 Kabiji Naambile mba, “Kyawama, Naji kumusha pa ba Mrs. Broy, ma minetitu acheche pitapo.”

Waambile mba, “Bamaama babena kukeba kwi mumona.”



278 Kabiji Naalulukile ne kutala, kabiji kwajinga bipango bikatampe byabaya, kabiji ne Lukumo lwa Lesa kasa lubena kwiya pe abo. Kabiji Naumvwine nyimbilo ya Bamalaika, “Muzhi Wami, Muzhi wawama.” Natatwile kuya peulu pandandalashi, lubilo lwabaya mo Nakonsha kubila. Kabiji byo Nafikile pa kibelo, waimene byobya, wamvwala kitoka, aya suki ifita, yalepa, ibena kukwata panyuma yabo. Wasutwile maboko anji, monka mo aubilanga inge Nabwela pa muzhi kasa nakoka kufuma ku mingilo nangwa kintu kimo. Namukwachile ku maboko, kabiji Naambile mba, “Mutemwe, Namona Sharon popa panshi.” Aambile mba, “Aye ke songwakazhi walamba, kechi ibyo nenyi?”

279 Aye waambile mba, “Ee, Bill.” Waambile mba, “Bill.” Wabikile maboko anji pe amiwa, (kabiji waambile mba) pa mapuzhi amitu, watatwile kupapasha, waambile mba, “Leka kusakamana pe amiwa ne pe Sharon.”

Naambile mba, “Mutemwe, Amiwa kuuba ne kikwasha ne.”

280 Aye waambile mba, “Bino Sharon ne Amiwa tuji bulongo kukila byo uji obewa.” Kabiji waambile mba, “Kechi wikale watwajijila nakusakamana atweba ne. Usakundaya amiwa nyi?”

281 Kabiji Naambile mba, “Hope,” Naambile mba, “Naikala bingi bubuke namambo aobewa ne mambo akwa Sharon, kabiji Billy ujilatu kimye kyonse.” Naambile mba, “Amiwa kechi nayuka byakuba nanji ne.”

282 Kabiji waambile mba, “Kikekalatu bulongo, Bill.” Waambile mba, “Obewa ndayetu amiwa amba kechi ukasakamana jikwabo ne.” Kabiji aye waambile mba, “Kuuba waikala nenyi?” Kabiji Nakeketele kuzhokoloka mwajinga kipona kikatampe.

283 Kabiji Navuluka Naesekele kupota kipona. Pano, mu kupezhako. Naesekele kupota kipona kimye kimo. Atweba twajingatu na byobya byakala—byakala bipona byazhinguluka—byabinchi bya lunengezho lwa kajo kakwiaula. Atweba twibingijishenga, byo byonka bipona byotwajinga nabyo. Kabiji twapotele kimo kya bibye bipona bya kushakaminako kunyuma, nobe... Nalubamo kana kyamusango ka kipona—kya kukokolokelamo. Kabiji kypotelwe madola sebetiini, kabiji mwakonsha kulipilako fili dola pa mulungu umo. Kabiji twatambwilepo kimo. Kabiji, oo, inge Naiya... Naingilanga juba jonse, kabiji ke kusapwila poso pakachi kabufuku nakuzhokoloka mu mikwakwa kabiji ne konse ko Nakonsha kusapwila.

284 Kabiji—kabiji Amiwa juba jimo Nashajiilemo mu malipilo ami. Twakakelwe kukumanisha, kabiji papichile juba ne jikwabo, kabiji pakupezhako juba jimo baishile na kusenda kipona kyami. Abwa bufuku, Amiwa kechi kalubako ne, wandengejile pai wapilipili. Kamulanda mukulumpe wakepa

kamubiji, aye—aye—aye wayukile amba Amiwa sakwikala walengeshiwa buvu. Kabiji pa kupwisha kajo kamulajilo Naambile mba, “Kika kyo wawamina bufuku buno, mutemwe?”

<sup>285</sup> Kabiji aye waambile, “Mba, Najikwambila basongwalume botwaikala nabo amba bapoye mizambo. Kechi mwalanguluka mba twafwainwa kuya kumukola na kuloba pa kimye kicheche nenyi?”

Kabiji Naambile mba, “Ee, bino. . .”

<sup>286</sup> Kabiji watatwile kujila. Nayukile mba pajipo kintu kimo kyatama. Amiwa najinga nabuyuke mambo abo bambujileko jimo amba bakeya na kwi kitambula. Kabiji twakakelwe kulipila dola umo mu mulungu. Atweba twakakelwe, twakakelwe. . . kechi twakonsheshe ne. Wabikile maboko anji pe amiwa, Naile ku kibelo kabiji kipona kyami kyaya.

Aye wambujile Kokwa kwiulu, waambile mba, “Obewa wavuluka kyokya kipona nyi, Bill?”

Kabiji Naambile mba, “Ee, mutemwe, Navuluka.”

Waambile mba, “Abyo byo wajikulangulukanga, ke ibyo nenyi?”

“Ee.”

<sup>287</sup> Waambile mba, “Kyawama, kechi bakasende yuwe ne, awe walipililwa jimo.” Aye waambile mba, “Ikala panshi minetitu umo, Nakeba kwisamba ne obewa.”

Kabiji Naambile mba, “Mutemwe, Amiwa kechi ne kyumvwa kye ne.”

<sup>288</sup> Kabiji aye wambile mba, “Ndaye, Billy, ndaye mba kechi ukasakamana jikwabo ne. Obewa pano ubena kubwela.” Kabiji waambile mba, “Ndaye amba kechi ukasakamana ne.”

Kabiji Naambile mba, “Amiwa kuuba nauba kyokyo ne, Hope.”

<sup>289</sup> Kabiji ponkapotu Naishile ku, kyajinga ke fishi mu luumu. Nakeketele, kabiji Namvwine kuboko kwanji kwakumbata. Naambile mba, “Hope, uji muno mu luumu nyi?”

<sup>290</sup> Aye watatwile nkupapasha. Waambile mba, “Obewa usakundaya amiwa nyi, Bill? Ndaye amba kechi ukasongola ne. . . ukasakamana jikwabo ne.”

Naambile mba, “Amiwa nakulaya.”

<sup>291</sup> Kabiji byo a nyimbile pa kipuzhi kyami jibiji nangwa jisatu, ponkapo waile. Natolokele kabiji ne kwambula kyeya, nakeketele konse konse, aye waya. Bino walupukiletu kufuma muluumu. Aye kechi waya ne, aye ukiji na bumi. Aye wajinga Mwinakilishitu.

<sup>292</sup> Billy ne Amiwa twaile ku kilende kukwe kimye kyapita kunyuma, kasa asenda jiluba ja bainanji ne ja nyenga yanji,

ponka pa lukeelo lwa Kusangulwa, kabiji twalekele. Aye mulongo mwanyike watatwile kujila, aye waambile mba, “Taata, bamaama baji papo panshi.”

<sup>293</sup> Naambile mba, “Ine, mutemwe. Ine, kechi uji papo panshi ne. Nyenga kechi uji papo panshi ne. Tuji na kilende kyamvuwetwapo papo, bino kokwa kubushiya bwa kalunga kuji kilende kya kyashi amo Yesu mo alupukile. Kabiji juba jimo Aye ukeya, Aye ukeya na Nyenga ne Maama Nanji pamo.”

<sup>294</sup> Amiwa nji mukifulo kyakondo lelo, balunda. Amiwa—Amiwa kuuba natwajijila nakubulang’anatu ne. Ami... [Mulongo Branham wajila—Waku.] Lesa emupeshe. Twayai tukunyike mitwe yetu pa minetu umo.

<sup>295</sup> Anweba Nkambo! Bimye byavula, Nkambo, Naketekela mba kine bantu kechi bomvwa ne, inge balanguluka mba abye bintu biyatu byapeela. Bino kuji juba jikatampe jibena kwiya kimye Yesu kyo akeya kabiji bonse bwe bulanda bukashimunwa. Nalomba, Taata Wamwiulu, amba Anweba mwitukwashe kwikala benengezha.

<sup>296</sup> Kabiji awa mulaye wapeleleko, byo Namufyopele pa jibuta alwa lukeelo, amba nkamukumanya kokwa pajoja juba. Naketekela mba aye ukemana pa kyokya kifulo, na kubijika jizhina jami. Amiwa naikala wakishika kuyewa mulaye kufuma kyokakya kimye, Nkambo, kuzhokoloka ntanda yonse, mu misango yonse ya mampuzha, na kweseka kuleta Mambo awama. Nakoma pano, kabiji nakoka, Amiwa napwamo. Juba jimo Amiwa nkashika yuwe Baibolo japelako. Kabiji, Lesa, ndamai kwikala wakishika kuyuwe mulaye. Lamai lusa Lwenu pe ami, Nkambo. Kechi mundeke ntale pa bintu bya buno bumi ne, kana kwikela ku bintu biji kubushiya. Amiwa kwashai kwikala wabukishika. Amiwa kechi mbena kwipuzha mba mpewe mwanya wamaluba wa bintu byanekena, ine, Nkambo, akwe Kilishitu wami kasa afwile na kumana. Kabiji bonsetu bashala bafwile muyeka musangotu umo. Amiwa kechi naipuzha mba mpewe kintu kypela ne. Anweba ndekaitu ngikale wabukishika, Nkambo, wabukine. Lekai bantu batemwe pakuuba mba Amiwa ne batangijile kwiya kwi Anweba. Kabiji juba jimo kimye byo kipwa ne kubungakena mushi ya binchi byamazha amatamba, Amiwa nkakeba ku mukwata ku kuboko ne kumwendesha kumutwala peulu, mu kumwasha bantu ba ku Angelus Temple kabiji ne bakwabo bonse. Kikekala kimye kyawama bingi.

<sup>297</sup> Nalomba mba lusa Lwenu lwikale pa umo umo wa mwiaweba muno. Kabiji bonse banji muno, Nkambo, kape kechi bemuyuka ne kwimuyuka Anweba ne. Kabiji kape baji na batemwikwa babo baji bushiya bwa kalunga. Inge kechi bafikizha mulaye wabo ne, lekai bekyube ponkapano, Nkambo.

298 Mukimye kyo twakunyika mitwe yetu, Nakumya kana mukino kishimikwa kikatampe mute uno, baanga ba mwianweba bakonsha kwamba mba “Mulongo Branham, Nakeba kukumanya batemwe bami, ne amiwa. Amiwa—Amiwa—Amiwa njina batemwe bami kubushiya bwa mukola”? Kape mwalaile amba mukebakumanya, kapepo byo mwabujile ba Maama mba “mwendepo-bulongo” akwa ku kilende pa joja juba, kape mwabujile awa Nyenga mucheche mba “mwendepo-bulongo,” nangwa Taata, nangwa bamo ku kilende, mwibalaile mba mukebakumanya, kabiji anweba—anweba kechi mwakinengezha ne. Kechi mwalanguluka mba kino kyo kimye kyawama kyakwikyuba nenyi?

299 Ndekelaiko mambo pa kujila. Bino, oo, ami, anweba kechi mwayuka ne, balunda. Anweba kechi mwayuka byokiji—byokiji kwilambula ne! Akye kechi kintu kyakukaisha ne, kyakosa, kya jishimikila ja bumi.

300 Baanga mwi anweba bakonsha kwimana ponkapano ne kwiya kulutwe ku milombelo, amba, “Nasaka kukumanya batemwe bami”? Imanai kufuma mujibumba ne kwiya kuno. Mwakonsha kwikyuba nyi? Inge muntu umo ukyangye kwinengezha ne. Lesa emupeshe, mwane. Namona muntu mukote wachiluluka ubena kwiya, ne bakwabotu babena kwiya. Endai anweba bene, anweba muji mu maluumu apeulu, endaitu mwiye mu malaini. Nangwa kwimana, anweba mubena kukeba kuvulukwa mu milombelo pankapano. Abo byokiji. Imanaitu ponka pomuji. Akyo kyawama. Imanaitu, konse konse, anweba mwakonsha kwamba mba, “Amiwa nji ne bataata kubushiya, Amiwa nji ne bamaama nangwa na mutemwe kubushiya. Nasaka kuya nakwibamona. Nasaka kwibasambakana mu mutende.” Mwakonsha kwimana, imanaitu ponkapo, konse konse mu jibumba. Imanai ponka pomuji, ne kwamba mba, “Amiwa nakeba kwikitambula.”

301 Lesa akupeshe, inetu. Lesa emupeshe kunyuma koko. Kabiji emupeshe peulu popo. Nkambo emupeshe anweba papo, mwane. Abo ibyo. Apo peulu, aye Nkambo emupeshe. Kuzhokoloka, konse konse, imanai ponka po muji tulombe, Mupashi Wazhila kasa akiji pano ne kwenda mu michima yetu, pakuuba—pakuuba—pakuuba mba tulajike michima.

302 Mwayukatu, kibena kukeba kipwilo leelo ke kulajika michima. Atweba twafwainwa kuya ku Nzubo ya Mbumbi. Mafunjisho etu amasukuulu amambo awama alengwa ku manzubo kimye kimo kechi engilatu bulongo ne. Kyotubena kukeba ke musango-wakala ulala michima, lulapilo lwa mu michima, kwikala banekenena Lesa. Ibo bonka abo benengezha kwimana nyi?

Twayai tukunyike mitwe yetu tulombe.

<sup>303</sup> Anweba Nkambo, Ao waletele jibiji Yesu namambo... kufuma kubafwa, ne kwitubingisha atweba bonse ku lwitabilo, mu kuketekela. Nalomba, Nkambo, namba aba baimana ponka pobaji na kwimutambula Anweba, Nalomba mba lulekelo lwamambo lwikale pe abo. Kabiji, Anweba Nkambo, Nalomba mba bemutambule Anweba nobe Mupulushi wabo ne Mfumu kabiji ne Mutemwe, kabiji kape baji na bainabo nangwa bataata nangwa muntu umo uji kubushiya bwa kalunga. Kuji kintu kimo kine, baji na Mupulushi. Lekai balekelwe bubi bwabo, kabiji ne mizhilulwila yabo yonse ifumishiwepo, pakuuba mba myeo yabo yonse yomvwewe mu Masshi a Mwanamukoko, kabiji bakekale mu mutende kufuma papo.

<sup>304</sup> Kabiji juba jimo ja lukumo bintu byonse byo bikapita, lekai tukabungizhiwe ku Nzubo Yenu, kabiji ne kwikala kokwa nobe bisemi byabulwa kwabanwa, na kukumanya batemwe betu abo babena kwitupembelela kubushiya. Akye, twibapana kwi Anweba, amba “Anweba mu kamulame mu mutende walumbuluka ao uji na muchima waikala pe Aye.” Kiswishai kye, Nkambo, byo twibapana kwi Anweba. Mu Jizhina ja Mwaana Wenu, aye Nkambo Yesu. Amena.

<sup>305</sup> Lesa emupeshe. Amiwa nji naluketekelo mba bamingilo basa kumona konse komwaimana, kabiji basakwikala ne anweba mu mamineti acheche.

<sup>306</sup> Kabiji pano kuboba basakutambula bitupa byamilombelo. Billy, Gene ujipi ne Leo, baji kunyuma nyi? Baji kuno pakuuba mba bapane bitupa bya milombelo mu maminetitu acheche. Mulongo usa kupalang’anya jibumba mu milombelo, kabiji ne bitupa byamilombelo bisa kupanwa. Atweba tusa kubwela muno mu kakimye kacheche, na kulombelela bakolwa. Kijitu bulongo,



*JISHIMIKILA JABUMI BWAMI* KDE59-0419A  
(My Life Story)

Ino Mbila na Mulongo William Marrion Branham, yalupwilwe patanshi mu Kizungu Pamulungu mute, Mulombola 19, 1959, ku Angelus Temple ku Los Angeles, California, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2021 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)